

Loxrmars Sul

1

¹ Ngo mel Barloxr a. Ngo Yisu Zidu leil miar bei gger su ca a. Arbosobo ngo leil tiur a Yisu miardal dae ca hal mel bei lol a, ngo leil Arbosobo ddei ddar seirseir mel ca mel leil biar gger ssi lol. ² Ddar seirseir eil ddei mel Arbosobo halleix dder xiezi mel leil yar ddei sul ber gga bbeix har zaxr lol goxr a; ³ hherdder Arbosobo ddei Ssor leil biar. Yar ddei ggecir ddei leil bbeix ci a mel, yar Daxlweixl giedae ca a. ⁴ Yar si a, Arbosobo ddei Xiu ddei ddoddomo bei a, yar leil gol du xixl lei lol a, ca mel leil yar yarzi Arbosobo ddei Ssor a saexl lol. Yar mel dder niul ddei Seirpor Yisu Zidu a. ⁵ Ngua yar leil koxl dae a, Arbosobo ngua leil cirza-hanga seirseir meixl gger nei Yisu miardal dae ca loxr a. Yel ngua circuxr-hanga cassor-worssor mel leil yar ddei ddar seirseir mel biar gger ssi a, ca mel leil yar leil ddarzzi lol, yar ddei ddar no lol. Eine nga a mel yar leil middux lol. ⁶ Nia lei Arbosobo tiur teixl lei a Yisu Zidu dax hher ji dae ca mel a.

⁷ Ngo, nia Loxrmars zzi gga hher dae Arbosobo perniar dae nei yar tiur teixl lei a, yar ddei cassor-worssor loxr lol hazza leil xil vaexr gger. Niul ddei Arbbor Arbosobo nei Seirpor Yisu Zidu leil nia leil seirseir cirke meixl gger lol nia, nia leil nixmox zzaso lol nia.

Barloxr Loxrmars Su Ca Mel Leil I Ssi Niazzir

⁸ Nia Yisu Zidu leil arsae ddarzzi dae mel mer woxrke cirmaex-hanga lei biar ci a; yel ngo Yisu Zidu leil koxl dae a, hoba ngo ddei Arbosobo leil nawo. ⁹ Ngo nixmox cirtaex-lorbba Arbosobo leil visser a, yar Ssor Yisu ddei ddar seirseir mel ca mel leil biar gger. Ngo arddolcar Arbosobo dax ddar biar lei cirleixr nr nor nia leil holcir dae. Eil ddei mel Arbosobo

saexl, yar nia leil biar gger cexr. ¹⁰ Ngo Arbosobo leil qiuxr a, yar xiar dae mel dax zox dae a, eilcar a dder ngo leil nia dax halmaex ssi lol.

¹¹ Ngo nia leil yarzi sael mia loxia, yel nia leil Arbosobo ddei Xiu ddei cirza-hanga seirseir meixl gger mel li wo lol a, zabbar seirseir a ddarzzi doxr dae lol. ¹² Eine nga a niul zzicarzzi leil Yisu leil ddarzzi dae mia a, zzi leil nixmox dder vaer dax a.

¹³ Nael arzzi-nimar arzzi-nimo mel ngo nia leil saexl lol nia, ngo hormo boxl nei nia leil i ssi niazzir, yel nia dax halmaex hher dae ca mel leil Yisu leil ddarzzi lol, hherdder ngo Yoxrtaexl su nr nga ca mel leil Yisu leil ddarzzi lol mel sael a nga. Nael eilleix ci a lei ngo halae lei nr cexr.

¹⁴ Ngo arddolyox ca leil lei Yisu Zidu ddei ddar seirseir mel biar gger ssi nia. Hherdder Xilaxl ddar te su, Xilaxl ddar nr te su, sulsaxlsu, sul nr saexl su zzorbbeixlei, ngo yaa leil biar gger ssi nia. Eil ddei mel ngo bei mibbe ddei nga a. ¹⁵ Yel ngo yarzi sael nia Loxrmar zzi gga su ca mel leil lei ddar seirseir eil mel biar gger ssi niazzir.

Yisu Zidu Ddei Ddar Seirseir Mel

¹⁶ Ddar seirseir eil ddei mel Arbosobo ddoddomo bei dae ddei nga a. Yar Yisu leil ddarzzi su maelmaerjjia leil lei jiuxl. Yoxrtaexl su ca mel leil hoba jiuxl, saelnei Yoxrtaexl su nr nga ca mel leil jiuxl. Yel ngo ddar seirseir eil ddei seixldaddo nr zzir. ¹⁷ Arbosobo ddar seirseir eil ddei sser dae a, ca mel leil yar arsae yaa leil zuixl nr zza i mal gger saexl lol. Hherdder arddolcar ci lei Yisu leil ddarzzi a saelnei Arbosobo yaa leil zuixl nr zza i mal gger. Arbosobo Ddei Sul ber leil vaexr dae mel sael a nga, bbeix: “Arbosobo zuixl nr zza i mal gger ca mel Arbosobo leil ddarzzi doxr dae a cirse-cirsil olga li wo ddo,”^a eine bbeix a.

Arbosobo Zuixl Mel Leil Vuxryixr

^a1:17 Habagur Sul 2:4 leil vaexr dae.

¹⁸ Arbosobo merlabbor hher dae a ca mel leil saexl lol, ha arseir Arbosobo leil i nr du nei nr seir mel bei a yar sirzzi dae a yaa leil faxr. Yar faxr dae ca eil mel mel nr seir bei a, si leil Arbosobo ddei ddarzi mel nr saexl lol. ¹⁹ Arbosobo mel ca mel leil yar arseir a saexl lol ho a; yel ca cirddeir-hanga lei yar leil saexl var. ²⁰ Halleix merlo-milo bei cirdae a, Arbosobo yar cirse-cirsil ddoddomo bei dae mel nei yar arsaer arddeir a ca mel leil saexl lol ho a. Eil mel leil meixddurgga mia nr ddo bbeixarnar, nael yar bei teixl lei hazza-hamaer leil i a dder Arbosobo zza saexl ddo. Arseir lei cirza-hanga mel Arbosobo bei teixl lei nr nga, Arbosobo nr zza eine bbeix nr cexr. Yel Arbosobo sirzzi dae a yaa leil faxr arddeir a.

²¹ Ca eil mel mel Arbosobo leil saexl bbeixarnar, nael yar leil Arbosobo i mal nr gger, yar leil middux lol nia-nr-zzir, yar leil na-nr-wo. Yaa nrbba nrbba xiar, yaa xiar dae mel yarzi medeil, nixmox taex lei yarzi neix loxr a. ²² Yaa zzir dae a yaa mel yarzi jilixr, nga zzael yarzi medeil. ²³ Yaa si var ca nei ngaxssor-ngaxne, zzeir nei yirvu-nilhax mel dax zox dae a, armael leil bbex bei gger a zi, cirse-cirsil gol dae Arbosobo ddei leil zzael nr zi, yar leil mi-nr-ddux lol.

²⁴ Yel Arbosobo mel dder yaa leil armael nixmox zzar buxlguaer-laxlsixr xiar dae mel dax zox dae a, yarzzir-yarleixr yarzi seixldaddo hal mel bei ssi lol a, yaa ddei ggecir ddei yarzi vuxlsuxrddo lol. ²⁵ Yaa mel Arbosobo ddei ddarzi mel leil li nr nga a nei, yarjiar hal mel leil li a bbex mel leil zi. Yaa hazza-hamaer leil coxl teixl lei su Seirpor ddei leil zzael nr zi, Seirpor ddei coxl teixl lei hal mel leil zzael zi. Seirpor Arbosobo leil mel cirse-cirsil lei bbeix zae gger nia. Amae!

²⁶ Yaa eine bei a, Arbosobo dder yaa leil nrbba nrbba xiar dae yarzi seixldaddo hal mel sael a bei ssi lol a. Yaa ssormaer mel capor leil lizoxr nr nga a nei, ssormaer car ssormaer lei zzi leil lizoxr. ²⁷ Yaa capor mel lei ciryoxr a nga, ssormaer leil lizoxr nr nga a nei, buxlguaer-laxlsixr

xiar dae a, capor car capor zzi leil lizoxr, yarzi seixldaddo hal mel bei, yel yaa nr hoxr eil mel bei a ggecir ddei leil dder murgiertiex var.

²⁸ Yaa halae zzir dae a, Arbosobo leil saexl a mel armael dax azo guaxr-nr-zoxr. Yel Arbosobo dder yaa leil yarzi gexrddo xiar ji dae hal mel sael a, nrbba nrbba bei ssi lol a. ²⁹ Yaa nixmox zzar bbilbbi xiar ji dae mel hherdder nr seir, yarzi gexrddo, nixmox neixl, yarzi duxr, si leil nixnox, ca seixl, zzi dax zex, si leil fur, ca leil ke, ca leil kerbiar, ³⁰ nrbba nrbba biar, Arbosobo leil vuxryixr, si leil bei vuxryixr, mimu-ddarmumo bei, kuarddo, cirza-hanga nr seir mel xiar teixl lei a bei ssi, arbbor ama ddar nr no, ³¹ xiar nr saexl, koxl ssei nr ddo, ca leil per-nr-niar, ca leil zoxl-nr-nixr, cirza-hanga eil mel nga a. ³² Arbosobo mel eine bei su ca mel dder si mibbe bbeix goxr ho a yaa saexl bbeixarnar, nael yaa armael lar bei meixr nr nga a nei, halae kebal ca mel leil lei bei ssi lol meixr.

2

Arbosobo Bbaehhexhhexmo Ca Leil Serpaxl

¹ Ni si leil zzael bota, ni armael zzael yaa sael a yarzi gexrddo bei dae mel, ni bbeixddu lei nr zza. Yel ni eine bei a mel armael ddei armael leil zuixl dixl gger a. ² Niul lei saexl, Arbosobo mel ddarzi mel dax zox dae a, yarzi gexrddo ca eil mel leil ser. ³ Ni yaa leil zzael bota, ni zzael yaa dax ciryoxr a bei, Arbosobo ni leil faxr nr var ni zzir lei zzir nr ssa. ⁴ Ni, Arbosobo ca leil hazzi perniar halae yarzi ssertexr zza, eil mel leil i nr du a ngo? Holbbaexl yar ni leil perniar a mel, ni leil huixrsoxr lol ni nr saexl a ngo?

⁵ Nael ni noni dil nr ddo, huixr-nr-soxr a mel Arbosobo ni leil ho bei ho sirzzi. Yar ca leil bbaehhexhhexmo ser jjixr lei hal cir ni ci a, ni leil yarzi sael larhor faxr nia. Arseir leil lei mia lol. ⁶ Ca mel arsae bei dae mel Arbosobo yaa leil arsae serpaxl. ⁷ Sser gex doxr dae a seirseir bei su mel,

Arbosobo leil yaa leil i du lol nei middux lol niazzir, halae si nr var olga li wo niazzir, yel Arbosobo yaa leil cirse-cirsil lei olga gger. ⁸ Nael armael ddei seirggiebbær lar xiar su, ddarzi mel dax bei mae nr nga a nei nr seir mel dax bei mae su ca mel mel, Arbosobo yaa leil sirzzi a yaa leil faxr nia. ⁹ Ha nr seir bei su maelmaerjia lei goxrsol-goxrnaxr goxr nia, halae yaa yarzi sael zzasol var. Yoxrtaexl su ca mel hoba eine nga a saelnei Yoxrtaexl su nr nga ca mel eine nga var. ¹⁰ Nael ha seirseir bei su maelmaerjia mel, Arbosobo dder yaa leil middux lol, i du lol, nixmox zzar zzasol lol. Yoxrtaexl su ca mel hoba eine nga a saelnei Yoxrtaexl su nr nga ca mel eine nga var. ¹¹ Eil ddei mel Arbosobo ca nr i, bbaehhexhhexmo bei a nga arddeir a.

¹² Moxrxi ddei Lixlfaxr^b nr zza su ca mel mel, zuixl bei a cirse-cirsil Arbosobo dax bbe kae a; serpaxl car a yaa leil Lixlfaxr dax zox dae a serpaxl nr nga. Nael Moxrxi ddei Lixlfaxr zza su ca mel mel, yaa zuixl bei a; serpaxl car a yaa leil dder Lixlfaxr dax zox dae a serpaxl nia.

¹³ Arbosobo zuixl nr zza i mal gger ca mel mel Moxrxi ddei Lixlfaxr leil bbejjiur su nr nga a nei, Moxrxi ddei Lixlfaxr dax bei mae dae su mel nga a. ¹⁴ Yoxrtaexl su nr nga ca mel Moxrxi ddei Lixlfaxr nr zza bbeixarnar, nael yaa Lixlfaxr gga seirseir hal mel sael a bei arddeirnga a mel, yaa nixmox zzar Lixlfaxr leil saexl. ¹⁵ Yaa dder nixmox zzar hoxr bbeixsael nr hoxr saexl, cirdaedae a zzael, armael leil bota; cirdaedae a zzael, armael bei dae mel hoxr zzir. Eine nga a mel dder Moxrxi ddei Lixlfaxr mel yaa nixmox zzar ji dae i teixl lei ddo. ¹⁶ Ngo ca mel leil ddar seirseir biar gger dae mel dax zox dae a mel, nixixl ddei maelele ci a, Arbosobo

^b**2:12** *Moxrxi ddei Lixlfaxr* Halleix Arbosobo yar ddei Lixlfaxr Moxrxi leil bbeix gger a, Yirsaexllixl su ca mel leil yaa arsae Arbosobo dax bei mae nia saexl lol. Moxrxi ddei Lixlfaxr eine vaexr “Lixlfaxr.” Kebal lixfaxr mel eine vaexr “lixlfaxr.”

Yisu Zidu leil ca mel nixmox zzar kerzi dae hal mel leil ser lei lol nia.

Yoxrtaexl Su Ca Mel Leil Nei Lixlfaxr Leil Biar

¹⁷ Nael ni mel ni Yoxrtaexl su ca a eine bbeix, Moxrxi ddei Lixlfaxr leil koxl dae a Arbosobo nia leil jiuxl eine zzir, ni Arbosobo ddei cassor-worssor a eine kuar. ¹⁸ Ca mel ni leil Lixlfaxr mul gger a, yel Arbosobo ca mel leil arsae bei lol niazzir dae ni saexl halae hoxr bbeixsael nr hoxr lei saexl. ¹⁹ Ni zzir dae a, ni meix nr mia su ca mel leil jjiumo hier su, neixmar ggie hher dae ca mel leil bbele lol su.^c ²⁰ Ni Lixlfaxr zza a, ddarzi mel leil saexl a, yel ni zzir dae a ni mel ca medeil nei aniuxlsxor mel ddei sulmulsu a.^d ²¹ Ni ca mel leil zzael arsae Moxrxi ddei Lixlfaxr dax bei mae dae nia mul gger, ni armael zzael bei nr mae leir? Ni ca mel leil zzael bbeix, zzaegu ker nr ddo, ni armael zzael halae arsae ker leir? ²² Ni ca mel leil zzael bbeix, kerjiar nr ddo, ni zzael kerjiar leir? Ni bbex mel leil vuxryixr, nael halae neir xi gga zzaegu mel ker ssi leir? ²³ Ni Moxrxi ddei Lixlfaxr mel saexl eine kuar, nael ni halae Moxrxi ddei Lixlfaxr mel dax bei nr mae a, Arbosobo leil i nr du leir? ²⁴ Hherdder Arbosobo Ddei Sul ber leil vaexr dae mel sael a nga, bbeix: “Nia nr seir bei a mel, Yoxrtaexl su nr nga ca mel dder Arbosobo leil bbeix vuxryixr,”^e eine bbeix a.

²⁵ Ni Moxrxi ddei Lixlfaxr ddei dax bei mae dae arddeirnga a mel, ni gelir^f bei a dder ni leil seir a; nael ni Lixlfaxr ddei dax bei nr mae a mel,

^c**2:19** Meix nr mia su nei neixmar ggie hher dae ca mel dder Arbosobo ddei Lixlfaxr nr saexl su mel leil bbeix.

^d**2:20** Ca medeil nei aniuxlsxor mel dder Arbosobo ddei ddarzi leil nr saexl su mel leil bbeix.

^e**2:24** Yirsaexlyal Sul 52:5 nei Yirsijiexr Sul 36:22 leil vaexr dae.

^f**2:25** *gelir* Gelir bei mel dder capor ddei sirbeixl dder olniuxniux zzi ddei

ni gelir bei a lei, ni dax seirggiebbær cirdoxr lei nr zza. ²⁶ Yel gelir bei nr goxr ca mel Lixlfaxr dax bei mae dae arddeirnga a, yaa gelir bei nr goxr bbeixarnar, Arbosobo doxl nr nga yaa leil gelir bei goxr a suax, hherdder yar ddei cassor-worssor i mal gger a zzarmar? ²⁷ Nia Yoxrtaexl su ca mel mel Lixlfaxr ddei zza, gelir lei bei goxr bbeixarnar, nael nia Lixlfaxr ddei dax bei nr mae. Yel ggecir ddei leil gelir bei nr goxr su ca mel, Lixlfaxr ddei dax bei mae dae a, yaa dder ni leil zuixl zza dil gger a.

²⁸⁻²⁹ Arseir saelnei yarzi Yoxrtaexl su ca nei yarzi gelir bei su ca a neil? Hherdder nixmox zzar Arbosobo dax bei mae gaxzi su mel nga a; Yoxrtaexl su ddei cirza-hanga leiddur dax bei mae su nei ggecir ddei leil gelir bei su mel nr nga. Yarzi Yoxrtaexl su mel nixmox zzar Arbosobo dax bei mae gaxzi a mel, Lixlfaxr leil koxl dae nr nga, Arbosobo ddei Xiu ddei leil koxl dae a nga arddeir a. Ca eil mel ca yaa leil kuar gger nr nga a nei, Arbosobo yaa leil kuar gger.

3

Arbosobo Leil Mel Ddarzziddo

¹ Eine nga a, Yoxrtaexl su ca mel azo seirggiebbær ar ddei zza neil? Gelir bei a yoxl yaa dax azo ar ddei guaxrzoxr neil? ² Yaa dax seirggiebbær cirke zza mar. Yarzi zoxlyoxl ddei mel hherdder Arbosobo yar ddei ddar mel Yoxrtaexl su leil jia ji gger a.

³ Yoxrtaexl su ca mel gga Arbosobo ddei ddar mel leil ddar-nr-zzi su armel zza a dder, Arbosobo leil mel ddarzzi nr ddo a ngo? ⁴ Eine mel arsae nga var bbeixleir? Ca cirddeir-hanga lei fur lalnga zzorbbeixlei, Arbosobo mel yarzi a. Hherdder Arbosobo Ddei Sul ber leil vaexr dae mel sael a nga, bbeix:

caer teixl gger.

“Ni ddar bbeix a mel dder bbaehhex;
ca mel ni leil bota car,
cirddeir-hanga lei ni ca mel leil serpaxl a mel hoxr saexl var,”⁹
eine bbeix a.

⁵ Nael ngo ca mel xiar dae mel dax zox dae a bbeix: niul nr seir bei a, ca mel Arbosobo yarzi seir i teixl lei ddo. Halmel, niul nr seir bei a Arbosobo sirzzi a niul leil faxr a mel yar bbae-nr-hhex a nga arddeir a niul eine bbeix cexr cexr? ⁶ Arsaebeilei bbeix nr cexr! Arbosobo bbae-nr-hhex arddeirnga a, yar arsaer mer woxrke ca mel leil ser cexr bbeixleir? ⁷ Arseir bbeix: “Ngo ca leil fur a, ca mel leil Arbosobo mel yarzi a i teixl lei lol halae yar leil middux lol a; yar arsaenga a halae ngo leil zuixl zza su ca sael a serpaxl?” eine bbeix. ⁸ Yaa bbeix dae mel hoxr arddeirnga a, halmel, arsaenga a, “Niul nr seir bei dae mel seirseir loxr var” eine nr bbeix? Ddar eil qier mel dder ngua leil bbeix vuxryixr su ca mel ngua ddar eil mel bbeix goxr a bbeix arddeir a. Ca eil mel leil mel zuixl dixl gger mibbe.

Ca Maelmaerjia Lei Zuixl Zza

⁹ Halmel, niul Yoxrtaexl su ca mel bir Yoxrtaexl su nr nga ca mel leil seir leixl a ngo? Cirdoxr lei seir nr leixl. Ngua bbeix goxr a; Yoxrtaexl su ca mel nei Yoxrtaexl su nr nga ca mel lei zuixl zza. ¹⁰ Hherdder Arbosobo Ddei Sul ber leil vaexr dae mel sael a nga, bbeix:

“Zuixl nr zza su ca cirddeir lei nr zza.

¹¹ Arbosobo ddei ddarzi leil saexl su lei nr zza;
Arbosobo leil zo a yar leil qiuxr su lei nr zza.

⁹3:4 Sipi Sul 51:4 leil vaexr dae.

¹² Cirddeir-hanga lei Arbosobo dax bei nr mae,
yaa maelmaerjjia cexr nr ddo loxr lalnga.

Seirseir bei su cirddeir lei nr zza.”^h

¹³ Yaa ddar bbeix teixl lei mel yarzi vuxryixrddo, hherdder
“lixrbbaex ddei giexlpu a yarzi bbeirne ddux lei mel sael a nga.
Yaa ddei lo ddei lei nr seir ddar hal mel bbeix a ca leil fur.”ⁱ

“Yaa meirlaexgel ddei lei sae yarzi duxr hal mel sael a nga ca leil
ke.”^j

¹⁴ “Meir ddei gga ca leil hie no doxr nei yarzi duxr hal mel bbeix
doxr.”^k

¹⁵ “Yaa ddei qihher ddei jjurjiur-maemae beix dae a ca leil sirnilni
ddux lol;

ca leil bei no gger nei bei zil gger,

¹⁶ yaa ssi goxr ggie hanga dder bei xiaxr gger,
yarzi cix ddo bei mal gger.

¹⁷ Ca leil zzi dax toltor a bei lol var jjiumo hal zex leil yaa nr saexl.”^l

¹⁸ “Yaa Arbosobo leil lei nr gexr,”^m

eine bbeix a.

¹⁹ Niul lei saexl, Lixlfaxr leil bbeix dae ddar mel mel Lixlfaxr zza su
hherdder Yoxrtaexl su ca mel leil bbeix. Lixlfaxr ddei mel ca
maelmaerjjia leil ddar bbeixddu nr zza lol, halae cassor-worssor

^h**3:12** Sipi Sul 14:1-3; 53:1-3 nei Cuaxrdoxl Sul 7:20 leil vaexr dae.

ⁱ**3:13** Sipi Sul 5:9 leil vaexr dae.

^j**3:13** Sipi Sul 140:3 leil vaexr dae.

^k**3:14** Sipi Sul 10:7 leil vaexr dae.

^l**3:17** Yirsaexlyal Sul 59:7-8 leil vaexr dae.

^m**3:18** Sipi Sul 36:1 leil vaexr dae.

maelmaerjia leil Arbosobo yaa leil serpaxl lol. ²⁰ Arseir lei Lixlfaxr ddei dax bei mae dae a, Arbosobo yar leil zuixl nr zza i mal gger su nr zza. Lixlfaxr ddei mel ca mel leil yaa armael zuixl zza saexl lol arddeir a.

Yisu Leil Ddarzzi A Arbosobo Ca Mel Leil Zuixl Nr Zza I Mal Gger

²¹ Nael eilboxl Arbosobo mel ca mel leil yar arsae yaa leil zuixl nr zza i mal gger saexl lol ho a. Eil ddei mel Lixlfaxr dax bei mae ddei dax cirdoxr lei guaxr-nr-zoxr. Moxrxi ddei Lixlfaxr nei xiezi vaexr dae sul gga lei eine bbeix dae. ²² Arbosobo ca mel leil zuixl nr zza i mal gger a mel, ca mel Yisu Zidu leil ddarzzi a nga arddeir a. Azo ca lei ciryoxr a nga; Yisu Zidu leil ddarzzi a mel dder jiuxl wo ddo. ²³ Mer woxrke ca maelmaerjia lei zuixl bei, yaa Arbosobo yaa leil bei lol mel bei nr ci, yel yaa dder Arbosobo sael a seirceix-seirmaer nr nga, yar dax hher nr piar. ²⁴ Nael Arbosobo ca leil zoxlnixr a, yar dax toltor a nga lol, hherdder Yisu Zidu bei dae mel leil ngol dae a, ca mel leil zuixl mel gga jiuxl xixl lei ho a. ²⁵ Arbosobo Yisu Zidu leil zilabox loxr lol a. Ca mel Yisu yaa leil weix a sirnilni ddux a si ddarzzi a, Arbosobo yar leil ssoxrsuxl. Yar eine bei a mel ca mel leil yar armael bbaehhexhhexmo nga saexl lol. Yisu si xilmeir halleix nael, yar ssertexr zza a, ca mel zuixl bei goxr mel leil lei nr faxr. ²⁶ Eilleix nael, yar ca mel ddei zuixl mel bei pixl gger a, Yisu leil ddarzzi su hazza leil zuixl nr zza i mal gger. Yar eine bei a mel ca mel leil yar bbaehhexhhexmo bei saexl lol.

²⁷⁻²⁸ Hane nga a niul zuixl nr zza kuar ddo ddo neil? Kuar nr ddo. Niul saexl, Arbosobo niul leil zuixl nr zza i mal gger a mel, Lixlfaxr ddei dax bei mae dae nr nga a nei, Yisu leil ddarzzi a nga arddeir a. Eine nga a mel niul azo ar ddei kuar ddu nr zza.ⁿ ²⁹ Holbbaexl Arbosobo mel

ⁿ**3:27-28** Yoxrtaexl su ca cirmelmel a zzir dae a yaa Moxrxi ddei Lixlfaxr dax bei mae dae a Arbosobo yaa leil jiuxl. Eine nga a yaa yarzi

Yoxrtaexl su ca mel ddei Arbosobo lar nga a ngo? Nr nga, Yoxrtaexl su nr nga ca mel ddei Arbosobo lei nga a zzarmar? ³⁰ Arbosobo mel cirddeir lar zza. Yar mel Yoxrtaexl su ca mel leil nei Yoxrtaexl su nr nga ca mel leil^o lei Yisu leil ddarzzi lol a, yaa leil zuixl nr zza i mal gger. ³¹ Eine nga a, niul Yisu leil ddarzzi a mel Lixlfaxr ddei leil piar pixl gger nga nga? Nr nga mar! Doxgoxleixr, niul zzir dae a Lixlfaxr ddei zoxlyoxl.

4

Yalboxrlahar Arbosobo Leil Ddarzzi

¹ Arbosobo ca leil zuixl nr zza i mal gger eil ddei dax bbeix ci a mel, niul porpor Yalboxrlahar azo arddeir zza wo a neil? ² Yar armael bei dae mel dax zox dae a, Arbosobo yar leil zuixl nr zza i mal gger arddeirnga a, yar dder ca mel dax kuar ddu zza a. Nael Arbosobo dax mel yar kuar ddu nr zza. ³ Arbosobo Ddei Sul ber leil bbeix:

“Yalboxrlahar Arbosobo leil ddarzzi a,
Arbosobo dder yar leil zuixl nr zza i mal gger,”^p

eine bbeix a.

⁴ Wormusu worper li wo a mel, yaa leil meixl gger nr nga, yaa li wo

kuarddo. Nael Barloxr bbeix, Arbosobo yaa leil jiuxl a mel Lixlfaxr dax bei mae nr nga, Yisu leil ddarzzi a nga arddeir a.

^o**3:30** *Yoxrtaexl su ca mel leil nei Yoxrtaexl su nr nga ca mel leil* Xilaxl ddar bbeix: “gelir bei su mel leil nei gelir nr bei su mel leil.” Gelir bei su mel dder Yoxrtaexl su ca. Gelir nr bei su mel dder Yoxrtaexl su nr nga ca.

^p**4:3** Cuaxlsixljil Sul 15:6 leil vaexr dae.

mibbe. ⁵ Nael Arbosobo ca leil zuixl nr zza i mal gger a mel, yaa armael bei dae mel leil koxl dae nr nga, Arbosobo leil ddarzzi mel leil koxl dae arddeir a. Eine nga a Arbosobo mel zuixl bei su mel leil yar dax toltor a bei lol. ⁶ Arbosobo ca leil ssoxrsuxl a yaa leil zuixl nr zza i mal gger a mel, yaa armael bei dae mel dax zox dae nr nga, Arbosobo yaa leil seir lol a nga arddeir a. Hherdder Daxlweixl bbeix goxr mel sael a nga. Yar bbeix:

⁷ “Lixlifaxr dax bei nr mae su mel Arbosobo yaa leil vuxr-nr-yixr, zuixl bei goxr su mel Arbosobo yaa leil ssoxrsuxl ho a, Arbosobo yaa leil seir lol a!

⁸ Seirpor yaa leil zeixleixr zuixl zza nr bbeix a mel yaa dder miexr seir a,”^q

eine bbeix a.

⁹ Holbbaexl Arbosobo mel gelir bei su mel leil lar seir lol a ngo? Gelir bei nr goxr ca mel leil lei seir lol zzarmar? Yalboxrlahar Arbosobo leil ddarzzi a, Arbosobo yar leil zuixl nr zza i mal gger, hherdder ngua bbeix dae mel sael a nga. ¹⁰ Nael Arbosobo Yalboxrlahar leil yar dax toltor a nga lol a, arsaе nga lol arddeir a neil? Yalboxrlahar gelir bei ho a nga lol bbeixsael gelir nr bei seir nga lol neil? Yar gelir nr bei seir dder nga lol a. ¹¹ Yalboxrlahar Arbosobo leil ddarzzi ho a saelnei Arbosobo yar leil gelir bei lol. Gelir ddei mel Arbosobo yar leil zuixl nr zza i mal gger hoxltexr ddei lar nga. Eine nga a Yalboxrlahar dder Arbosobo leil ddarzzi su gelir nr bei seir hal mel ddei arbbor sael a nga, yel Arbosobo yaa leil lei zuixl nr zza i mal gger. ¹² Gelir bei goxr su ca mel arsaesael nga neil? Yaa Yalboxrlahar gelir nr bei seir dder Arbosobo leil ddarzzi dae hal mel sael a ddarzzi doxr dae arddeirnga a, Yalboxrlahar dder yaa ddei arbbor lei

^q4:8 Sipi Sul 32:1-2 leil vaexr dae.

nga.

¹³ Halleix Arbosobo Yalboxrlahar nei yar giedae ca mel leil middurbbor ddei li wo lol nia bbeix har zaxr goxr a.⁵ Arbosobo yar dax bbeix har zaxr a mel, yar Moxrxi ddei Lixlfaxr ddei dax bei mae dae nr nga a nei, yar Arbosobo leil ddarzzi a Arbosobo yar leil zuixl nr zza i mal gger a nga arddeir a. ¹⁴ Yel Lixlfaxr dax bei mae dae a middurbbor ddei li wo ddo arddeirnga a, halae Arbosobo leil ddarzzi a azo bei bbeixleir? Arbosobo bbeix har zaxr goxr mel dder baexr a bbeix har zaxr a. ¹⁵ Arsaenga a Lixlfaxr dax bei mae a, Arbosobo ca leil zuixl nr zza i mal nr gger neil? Ca mel Lixlfaxr dax bei mae gax-nr-zi a, Arbosobo dder sirzzi a yaa leil faxr a nga arddeir a. Ca mel Moxrxi ddei Lixlfaxr zza nr saexl arddeirnga a, yaa Moxrxi ddei Lixlfaxr leil bbeix dae mel dax bei nr mae dae lei yaa nr saexl.

¹⁶⁻¹⁷ Yalboxrlahar Arbosobo leil ddarzzi a mel Arbosobo dder yar bbeix har zaxr goxr mel yar leil meixl gger. Arbosobo bbeix har zaxr dae eil ddei mel mer woxrke ca maelmaerjia leil meixl gger niazziir. Lixlfaxr ddei dax bei mae su mel leil lar meixl gger nr nga a nei, Yalboxrlahar sael a Arbosobo leil ddarzzi su ca hal mel leil lei meixl gger. Arbosobo mel Yalboxrlahar leil niul ddei arbbor i mal gger. Hherdder Arbosobo Ddei Sul ber leil vaexr dae mel sael a nga, bbeix: “Ngo ni leil circuxr-hanga ca mel ddei arbbor bei lol ho a,”^t eine bbeix a. Arbosobo mel si ho ca mel leil gol du xixl lei lol, azo lei nr zza seir, cirza-hanga lei yar coxl teixl lei.

^s**4:13** *Halleix Arbosobo Yalboxrlahar nei yar giedae ca mel leil middurbbor ddei li wo lol nia bbeix har zaxr goxr a.* Halleix Arbosobo yar leil ddarzzi su mel leil middurbbor cirza-hanga gger, cirmaex-hanga guaxr lol bbeix har zaxr goxr ho a.

^t**4:16-17** Cuaxlsixljil Sul 17:4 leil vaexr dae.

¹⁸ Yalboxrlahar xiar ngexl ggie lei nr zza halcar a, yar halae Arbosobo leil ddarzzi a, yel Arbosobo dder yar leil ca hormo cuxr ddei arbbor bei lol a. Hherdder Arbosobo Ddei Sul ber leil vaexr dae mel sael a nga, bbeix: “Ni giedae ca mel lei gie mel sael a miur nia,”^u eine bbeix a.

¹⁹⁻²⁰ Arbosobo Yalboxrlahar leil eine bbeix halleix, Yalboxrlahar mel cirxiu koxl loxr niazzir dae a. Yar zzir dae a armael ddei ggecir ddei lei middur zzar cir peix giexlhex dae ho a sael a nga, yar maerssor Sala lei anix xiu zi ddei goxr ho a. Nael yar halae Arbosobo yar dax bbeix har zaxr goxr ddei leil ddarzzi dae, nixmox zzar yarzi barver, ho bei ho Arbosobo leil ddarzzi dax, nixmox zzar lei ho bei ho hhel du lei, yel Arbosobo leil middux lol. ²¹ Arbosobo yar dax bbeix har zaxr goxr mel arsaebeilei bei ci var ddarzzi. ²² Hherdder eine nga a, Arbosobo Yalboxrlahar leil zuixl nr zza i mal gger arddeir a. ²³ Nael “yar zuixl nr zza i mal gger” bbeix dae ddar eil qier mel Yalboxrlahar leil lar bbeix nr nga a nei, ²⁴ niul leil lei bbeix arddeir a. Niul mel hherdder Seirpor Yisu si a yoxl yar leil gol du xixl lei lol Arbosobo ddei leil ddarzzi su mel nga a. ²⁵ Seirpor Yisu mel niul ddei zuixl mel leil weix a, ca mel leixrga gga jia ji gger a si a. Arbosobo mel niul leil yar armael dax toltor a nga lol a, yel Seirpor Yisu leil gol du xixl lei lol.

5

Arbosobo Dax Toltor A Nga

¹ Eine nga a niul Arbosobo leil ddarzzi a, Arbosobo dder niul ddei zuixl maelmaerjia leil ssoxrsuxl. Yel niul Seirpor Yisu Zidu bei dae mel leil ngol dae a dder Arbosobo dax toltor a nga; ² niul Yisu leil ddarzzi a Arbosobo halae niul leil cirleixr-nr-nor cirza-hanga seirseir mel meixl

^u4:18 Cuaxlsixljil Sul 15:5 leil vaexr dae.

gger doxr dae. Niul ggegge-sese arla Arbosobo dax cirgo a middux loxia.

³ Eine lar nr nga a nei, niul goxr sol dae a lei, halae ggese. Niul saexl, goxr sol goxr a mel niul ssertexr zza nia. ⁴ Niul ssertexr zza a mel Arbosobo dder niul leil nixloxdda. Arbosobo niul leil nixloxdda a mel niul dder Arbosobo dax cirgo a middux loxia cexr. ⁵ Niul nga loxia dae eil ddei mel niul leil qiaxrmeix zzi si nr var. Eil ddei mel Arbosobo niul leil perniar a nga arddeir a. Arbosobo yar ddei Xiu ddei niul leil gger a, yar niul leil yarzi sael perniar niul leil saexl lol.^v

⁶⁻⁷ Nixmox bbaehhexhhexmo ca hal mel leil weix a si ssi su mel yarzi nganiul, yarzi seir ca hal mel leil weix a si ssi su ca mel zza piar a. Nael halleix niul armael leil jiuxl nr var halcar a, Zidu mel dder Arbosobo dixl har dae nixixl ddei dax zox dae a, Arbosobo leil i nr du su ca mel leil si gger a. ⁸ Niul zuixl zza car a dder Zidu mel niul leil si gger ssi ho a, yel niul dder Arbosobo niul leil perniar saexl.

⁹ Zidu sirnilni ddux a si a, Arbosobo niul ddei zuixl mel ssoxrsuxl a; yel niul Yisu leil koxl dae a mel Arbosobo gielgiel yar sirzzi a ca leil faxr ggie dixlyuxl gga niul leil jiuxl xixl lei a. ¹⁰ Halleix niul Arbosobo leil dir car a, Arbosobo halae yar ssor leil si lol a niul leil yar dax toltor a nga lol. Eilboxl niul Arbosobo dax seir xixl a, yar ddei ssor ddei gol dae a gielgiel niul leil jiuxl wo a. ¹¹ Eine lar nr nga a nei, niul Seirpor Yisu Zidu bei dae mel leil koxl dae a, Arbosobo leil nawo, bbeix zae gger. Yisu mel dder niul leil Arbosobo dax toltor a bei lol su ddei nga a.

Yalda Nei Zidu

^v**5:5** *Arbosobo yar ddei Xiu ddei niul leil gger a, yar niul leil perniar dae mel saexl lol* Xilaxl ddar bbeix: “Arbosobo yar ddei Xiu ddei niul leil gger a, yar niul leil yarzi sael perniar niul leil saexl lol.”

¹² Yalda zuixl bei a dder middurbbor ca mel lei zuixl zza a, si var.^w Ca cirddeir-hanga lei zuixl zza, yel ca maelmaerjjia dder si nia. ¹³ Moxrxi vaexr dae Lixlfaxr halae nr zza seir, cassor-worssor mel dder zuixl bei dae a. Nael Lixlfaxr nr zza a mel dder Lixlfaxr dax zox dae a ca leil zuixl dixl gger nr cexr. ¹⁴ Hherdder eine nga zzorbbeixlei Yalda dax cirdae a Moxrxi dax zzezze lei, ca mel si var. Yalda sael a zuixl hane nr bei su ca mel lei si var. Yalda bei dae mel mel Yisu Zidu^x bei dae mel dax lesel. Yalda mer woxrke ca maelmaerjjia leil si lol, Yisu yar leil ddarzzi su cassor-worssor maelmaerjjia leil gol du xixl lei lol.

¹⁵ Yalda mel zuixl bei a, ca cirke lei si a. Nael Arbosobo ca cirke leil cirza-hanga seirseir daxlgaxl-daxllixl meixl gger. Yisu Zidu mel ca mel leil weix a si a, Arbosobo ca ddei zuixl ssoxrsuxl. Yel Yalda bei dae ddei mel Arbosobo bei dae ddei le-nr-sel. Yalda mel ca mel leil zuixl bei lol, Arbosobo mel ca ddei zuixl ssoxrsuxl. ¹⁶ Yalda zuixl bei a nael Arbosobo ca leil serpaxl a, zuixl dixl gger. Ca cirke zuixl bei a nael, Yisu yaa leil weix a si a, Arbosobo yaa leil cirza-hanga seirseir meixl gger, yaa ddei zuixl ssoxrsuxl, yaa leil zuixl nr zza i mal gger. ¹⁷ Yalda zuixl bei a mel, cassor-worssor mel dder si nia. Yisu Zidu si a mel, yar leil ddarzzi su ca mel gielgiel cirse-cirsil lei olga zza. Eil ddei mel Arbosobo yaa leil cirza-hanga seirseir meixl gger halae yaa leil zuixl nr zza i mal gger a nga arddeir a.

¹⁸⁻¹⁹ Eine bbeix zeil lei a, Yalda Arbosobo miardal dae ddei dax bei nr mae a mel ca maelmaerjjia lei zuixl zza ca loxr a. Ciryoxr a nga, Yisu Arbosobo miardal dae ddei dax bei mae dae a Arbosobo yar leil ddarzzi su ca maelmaerjjia leil zuixl nr zza i mal gger. Yel Yalda zuixl bei a mel

^w5:12 Cuaxlsixljil Sul 3 leil biar dae.

^x5:14 *Yisu Zidu* Xilaxl ddar bbeix “arddolcar a lei nia hal ddei.” Yar mel dder Yisu Zidu nga a.

ca maelmaerjgia leil lei zuixl dixl gger a. Ciryoxr a nga, Yisu ca leil weix a si a mel Arbosobo Yisu leil ddarzzi su ca maelmaerjgia leil zuixl nr zza i mal gger, yaa leil cirse-cirsil olga li wo lol a.

²⁰ Arbosobo Lixlfaxr ddei ca mel leil gger a mel, yaa bei nr sir bei dae mel miur dax, nael zuixl mel ho bei ho miur a mel, Arbosobo yaa leil ssoxrsuxl dae mel gielgiel miur. ²¹ Eine nga a mel, zuixl mel ca leil guaxr dae a yaa si var. Ciryoxr a nga, Arbosobo ca mel leil ssoxrsuxl a, yaa leil zuixl nr zza i mal gger a, yaa niul ddei Seirpor Yisu Zidu leil koxl dae a, cirse-cirsil lei si nr var olga zza var.

6

Zuixl Ddei Leil Bei Leixl Gger

¹ Halmel, niul arsae bbeix nia neil? Niul halae zeixleixr zuixl bei doxr dae a, yel Arbosobo niul leil cirza-hanga seirseir meixl gger dae mel ho bei ho miur dax lol a ngo? ² Eine mel arsae var bbeixleir? Zuixl ddei mel niul leil guaxr nr gex dae, niul arsae halae zeixleixr zuixl bei doxr dae leir? ³⁻⁴ Niul sexlsir a mel, Yisu Zidu dax cir piar a bei a; halae yar dax cirgo a si, cirgo a giexlhex sael a nga. Holbbaexl nia nr saexl a ngo? Yel niul sexlsir car a mel, Arbosobo niul leil beijjiu a niul dder ca mu boxl a. Hherdder Yisu Zidu si a Merhhexr Arbbor yoxl yarzi ddo yar leil gol du xixl lei lol hal mel sael a nga.

⁵ Nael niul Yisu Zidu dax cir piar a bei, yar dax cirgo a si arddeirnga a, niul dder yar dax cirgo a gol du xixl lei nia. ⁶⁻⁷ Niul lei saexl, niul halleix zuixl bei dae ca hal ddei mel Yisu Zidu dax cirgo a sixrxixljiaxl ddei leil diexr deix dae a si ho a.^y Yel niul zeixleixr zuixl ddei zebol nr bei. Eil ddei mel ca mel si ho a zuixl ddei yaa leil nr guaxr dae a nga arddeir a.

^y6:6-7 Yirfuxrsor Sul 4:22 leil i ssi.

⁸ Niul Yisu Zidu dax cirgo a si arddeirnga a, niul lei yar dax cirgo a gol du xixl lei var ddarzzi nia. ⁹⁻¹⁰ Niul saexl, Yisu Zidu mel si a yoxl gol du xixl lei ho a. Si eil ddei mel yar dax guaxr-nr-zoxr, yar zeixleixr si nr var. Yar si a mel niul ddei zuixl mel leil weix a si, nael yar gol dae a mel Arbosobo leil weix a gol dae.

¹¹ Ciryoxr a nga, nia Yisu Zidu dax cir piar a bei a Arbosobo leil weix a gol dae. Nia holcir dae nia, zuixl ddei nia leil guaxr nr gex dae ho a.

¹² Yel zuixl ddei nia leil guaxr dae lol nr ddo. Nr nga a, nia dder nr seir xiar dae mel dax bei mae ssi. ¹³ Nia ggecir ddei leil zuixl bei ssi lol nr ddo, seirseir mel bei ssi lol nia. Halleix nael nia ddei xiu mel si a; eilleix nael gol dae a; yel nia dder ca cirddeir-lorbba Arbosobo leil jia ji gger. ¹⁴ Nia eine bei a mel, Lixlfaxr ddei nia leil guaxr dae nr nga a nei, Arbosobo cirza-hanga seirseir mel nia leil meixl gger a, yar nia leil guaxr dae a nga arddeir a. Yel zuixl mel nia leil guaxr dae nr cexr.

¹⁵ Hane nga a Arbosobo niul leil cirza-hanga seirseir meixl gger a, niul dder Lixlfaxr noni nr ssa, yel niul zuixl bei ddo a ngo? Bei nr ddo mar!

¹⁶ Nia arseir leil nia leil guaxr lol a mel, nia dder arseir ddei zebol nga a nia saexl zzarmar? Nia zuixl ddei ddar no a mel dder zuixl ddei zebol, nia Arbosobo ddei ddar no a mel dder Arbosobo ddei zebol. Nia zuixl bei a mel si nia, nia Arbosobo ddei ddar no a mel, yar nia leil zuixl nr zza i mal gger. ¹⁷ Halleix nia zuixl ddei zebol bei goxr a bbeixarnar, nael eilleix nia nixmox cirtaex-lorbba ngua nia leil mul gger goxr mel no ni. Yel ngo Arbosobo leil nawo. ¹⁸ Nia leil mel zuixl mel gga jiuxl teixl lei ho a, nia Arbosobo ddei zebol bei a, seirseir mel bei dae a.

¹⁹ Nia Arbosobo ddei ddar noni wo nr xie a, ngo zebol mel leil birdae a^z nia leil biar gger. Nia ddei ggecir ddei leil bbeix ci a mel, halleix nia

^z**6:19** ngo zebol mel leil birdae a Xilaxl ddar bbeix: “ca mel xiar dae mel dax zox dae a,” eine bbeix.

capor-ssormaer buxlguaxr-laxlsixr bei, cirza-hanga nr seir bei, Moxrxi ddei Lixlfaxr dax bei nr mae, hherdder zuixl ddei zebol loxr a. Eilleix nael Arbosobo ddei zebol bei a, seirseir bei nia. Yel Arbosobo ddei seirceix-seirmaer ca loxr a. ²⁰ Nia halleix zuixl mel ddei zebol bei car a, nia zzir dae a nia seirseir mel bei nr ssa. ²¹ Nael nia halleix bei goxr hal mel nia dax arddolyox seirggiebbær arddeir zza bbeixleir? Eilboxl nia zzir dae a yarzi seixldaddo. Nia hane bei a mel, arddolcar ci a mel, si lalnga! ²² Nael eilboxl nia leil mel zuixl mel gga jiuxl teixl lei ho a, Arbosobo ddei zebol bei a mel, nia dder Arbosobo ddei seirceix-seirmaer ca loxr a, cirse-cirsil lei si nixixl nr zza olga zza. Eil ddei mel nia dax seirggiebbær ddei nga a. ²³ Arseir zuixl bei a mel dder si nia. Nael niul Seirpor Yisu Zidu dax cir piar a bei a mel, Arbosobo niul leil seirseir meixl gger a, cirse-cirsil lei olga zza.

7

Moxrxi Ddei Lixlfaxr Ddei Arsae Lerler Guaxr

¹ Arzzi-nimar arzzi-nimo mel, nia mel Moxrxi ddei Lixlfaxr saexl su ca a. Lixlfaxr ddei mel gol dae seir ca mel dax lar guaxrzoxr zzarmar? Eil ddei mel nia nr saexl arddollei bbeixleir? ² Bir dae a bbeix: capor zza ho ssormaer arddeir a, yar capor gol dae seir a mel lixlfaxr ddei yar leil guaxr dae, yar kebal capor zo nr cexr. ³ Yel yar capor gol dae seir car a, yar kebal capor dax naer ssi arddeirnga a mel, yar dder kerjiaer a. Nael yar capor si ho a mel, lixlfaxr ddei dder yar leil nr guaxr dae a; yar dder armael lozza a. Yel yar zeixleixr kebal capor zo box zzorbbeixlei, kerjiaer nr suax.

⁴ Ciryoxr a nga, ngo ddei arzzi-nimar arzzi-nimo mel, Yisu sixrzixljiaxl leil si halcar, nia yar dax cirgo a si ho a, Moxrxi ddei Lixlfaxr zeixleixr nia leil nr guaxr. Nia dder Yisu Zidu dax cir piar a bei. Niul yar dax cir

piar a bei a mel, niul Arbosobo leil weix a seirseir mel bei nia. ⁵ Halleix niul ca mel xiar dae mel dax bei mae dae a nixixl goxr a niul zuixl bei ssi, yel niul dder Arbosobo dax bbe kae a. Niul Moxrxi ddei Lixlfaxr saexl a, nixmox zzar ho bei ho nr seir hal mel xiar. ⁶ Nael eilboxl Yisu dax cirgo a si ho a, Lixlfaxr zeixleixr niul leil nr guaxr. Yel niul halleix ddei Lixlfaxr dax bei mae nr nga a nei, eilleix Arbosobo ddei Xiu ddei niul leil mul gger mel dax bei mae dae a, Arbosobo leil visser.

Moxrxi Ddei Lixlfaxr Nei Zuixl Leil Biar

⁷ Eine nga a, Moxrxi ddei Lixlfaxr ddei mel zuixl a niul eine bbeix cexr a ngo? Arsaebeilei bbeix nr cexr! Lixlfaxr ddei mel zuixl mel arddolyox a ngo leil saexl lol. Lixlfaxr ddei leil “si ddei cirza-hanga li niazzir nr ddo” eine nr bbeix dae arddeirnga a, si ddei cirza-hanga li niazzir bbaexl arsae a lei ngo nr saexl. ⁸ Nael Lixlfaxr ddei leil mel eine miardal dae a, zuixl ddei dder ngo leil cirza-hanga li niazzir lol. Lixlfaxr ddei nr zza a mel, zuixl ddei dder ngo leil eine guaxr nr cexr. ⁹ Nael halleix Lixlfaxr ddei leil miardal dae mel saexl gax-nr-zi a, ngo armael xiar dae mel sael a nixixl goxr. Giedae Lixlfaxr miardal dae mel saexl ho a, ngo ho bei ho zuixl bei meixr a, ngo dder si a Arbosobo dax bbe kae a. ¹⁰ Ngo saexl, Lixlfaxr ddei leil miardal dae ddei mel ca mel leil olga zza lol arddeir a. Nael doxgoxleixr ngo leil zzael si lol a Arbosobo dax bbe kae lol a.^a

¹¹ Zuixl ddei mel Moxrxi ddei Lixlfaxr ddei leil miardal dae ddei sser dae a, ngo leil fur, ngo leil Arbosobo dax bbe kae lol. ¹² Moxrxi ddei Lixlfaxr ddei mel seirceix-seirmaer arddeir a. Moxrxi ddei Lixlfaxr leil miardal dae mel lei seirceix-seirmaer, bbaehhexhhexmo, seirseir a nga. ¹³ Halmel,

^a7:10 Ciryoxr a nga Arbosobo Yalda leil miardal dae ddei mel yar leil olga zza lol, nael yar no-nr-ni a yar leil si lol. Cuaxlsixljil Sul 3 leil biar dae.

seirseir mel ngo leil si lol a ngo? Eine mel arsaе var bbeixleir? Zuixl mel ngo leil si lol arddeir a. Zuixl ddei mel Lixlfaхr leil miardal daе seirseir mel leil sser daе a, ngo leil si lol. Eine nga a mel zuixl mel yarzi sael gexrddo ca leil saexl lol a.

¹⁴ Niul lei saexl, Lixlfaхr ddei mel Arbosobo ddei Xiu ddei ca leil gger arddeir a. Nael ngo mel armael xiar daе mel dax zox daе a bei meixr ca arddeir a; armael leil zuixl ddei zebol bei lol ho a. ¹⁵ Ngo seirseir bei ssi niazzir mel zzael ngo nr bei ssi, doxgoxleixr ngo vuxryixr daе mel zzael bei ssi. Yel ngo azo bei daе ngo nr saexl. ¹⁶ Nael ngo, ngo bei ssi nia-nr-zzir mel lei bei arddeirnga a, ngo dder Lixlfaхr ddei mel seir eine nr bbeix goxr nr ddo a. ¹⁷ Eine nga a, ngo bei daе mel mel ngo bei yuex nr nga a nei, ngo dax hher ji daе zuixl ddei ngo leil bei lol arddeir a. ¹⁸ Ngo mel seirseir bei ssi yuex, nael ngo bei teixl lei nr xie, yel ngo saexl, ngo nixmox zzar seirseir hher nr ji a nga arddeir a. ¹⁹ Ngo bei ssi yuex seirseir mel zzael ngo nr bei ssi, ngo bei ssi nr yuex nr seir mel zzael ngo yoxl bei ssi. ²⁰ Nael ngo, ngo bei ssi nr yuex mel bei ssi arddeirnga a, eil mel mel ngo bei yuex nr nga a nei, ngo nixmox zzar hher ji daе zuixl ddei ngo leil bei lol arddeir a.

²¹ Yel ngo saexl, ngo seirseir bei ssi niazzir daе car a mel, nr seir mel dder ngo dax hher dax daе. ²² Arsaenga a eine nga neil? Ngo nixmox zzar mel Arbosobo ddei Lixlfaхr ddei leil lizoxr daе. ²³ Nael ngo i teixl lei a; kebal lixlfaхr arddeir a ngo ggecir ddei gga hher ji daе a ngo leil zuixl bei meixr lol. Lixlfaхr eil ddei mel ngo nixmox zzar lizoxr daе lixlfaхr ddei dax zaxlddaexr a, ngo leil ssu gex daе a nga arddeir a. ²⁴ Eil'aer, ngo nixmox zzar yarzi zzasol sor! Ngo ggecir ddei gga hher ji daе zuixl ddei ngo leil si lol. Arseir ngo leil zuixl eil ddei gga jiuxl teixl lei bbeixleir? ²⁵ Nael Arbosobo leil nawo a. Yar niul Seirpor Yisu Zidu bei goxr mel leil ngol daе a, ngo leil jiuxl teixl lei a.

Hherdder bbeix, ngo armael mel nixmox zzar zzael Arbosobo ddei Lixlfaxr ddei dax bei mae dae, ngo ggecir ddei zzael zuixl bei meixr.

8

Nixixl Goxr A Arbosobo Ddei Xiu Ddei Dax Bei Mae Dae

¹⁻² Ca leil olga gger su Arbosobo ddei Xiu ddei mel, Yisu Zidu bei dae mel leil ngol dae a, ca leil si lol var zuixl ddei gga jiuxl teixl lei ho a. Yel eilboxl Yisu Zidu dax hher ji dae su ca mel leil dder zuixl dixl nr gger a.

³ Ca mel zuixl bei meixr a, yaa Moxrxi ddei Lixlfaxr mel bei ci nr xie a, Moxrxi ddei Lixlfaxr yaa leil jiuxl nr cexr. Nael Arbosobo ca mel leil jiuxl cexr. Yar armael ddei Ssor ddei leil middurbbor zi mal lei a, yar leil ca loxr lol a. Yisu zuixl zza su ca mel sael a hoxrneixr niar dae ggecir arddeir zza. Yar ca mel ddei zuixl mel leil weix a ggecir ddei Arbosobo leil zi, yel Arbosobo yar leil zuixl dixl gger a, niul zuixl mel bei pixl gger a.

⁴ Arbosobo eine bei a mel, niul leil Lixlfaxr miardal dae mel dax bei mae gaxzi lol. Niul ca xiar dae mel dax bei mae nr nga a nei, Arbosobo ddei Xiu ddei xiar dae mel dax bei mae dae.

⁵ Zuixl bei meixr su ca mel mel, ca xiar dae mel xiar. Arbosobo ddei Xiu ddei dax bei mae su ca mel mel, Arbosobo ddei Xiu ddei xiar dae mel xiar.

⁶ Zuixl bei meixr su ca mel mel si lalnga, hherdder Arbosobo dax bbe kae. Arbosobo ddei Xiu ddei dax bei mae meixr su mel nixmox zzaso, olga zza, hherdder Arbosobo dax hher wo ddo. ⁷ Zuixl bei meixr su mel dder

Arbosobo leil vuxryixr su mel nga a. Ca eil yox mel Arbosobo ddei Lixlfaxr no-nr-ni, Lixlfaxr leil miardal dae mel yaa bei ci nr xie. ⁸ Yaa Arbosobo leil ggese lol nr var.

⁹ Nael Arbosobo ddei Xiu ddei nia nixmox zzar hher ji dae arddeirnga a mel, zuixl nia leil nr guaxr, Arbosobo ddei Xiu ddei nia leil guaxr. Zidu ddei Xiu ddei arseir nixmox zzar hher nr ji dae arddeirnga a mel, yar

dder Zidu dax cir piar a nr bei. ¹⁰ Zidu nia nixmox zzar hher ji dae arddeirnga a mel, nia ggecir ddei zuixl zza a si ho a bbeixarnar, nael Arbosobo nia leil zuixl nr zza i mal gger a, Arbosobo ddei Xiu ddei nia leil cirse-cirsil olga gger. ¹¹ Arbosobo mel Yisu si a yoxl yar leil gol du xixl lei lol ho a. Yel Arbosobo ddei Xiu ddei nia nixmox zzar hher ji dae arddeirnga a, Arbosobo Yar ddei Xiu sser a, nia si var ca mel leil gol du xixl lei lol nia.

¹² Eine nga a arzzi-nimar arzzi-nimo mel, nixixl goxr a zuixl bei meixr nr ddo. ¹³ Nia zuixl bei meixr arddeirnga a mel, si lalnga. Nael nia Arbosobo ddei Xiu ddei dax bei mae dae a, zuixl ddei leil bei leixl gger arddeirnga a mel, olga zza. ¹⁴ Arbosobo ddei Xiu ddei arseir leil hier dae a mel, yar dder Arbosobo ddei anix nga a. ¹⁵ Nia nixmox zzar hher ji dae Xiu ddei mel, nia leil gexrgexr-zizimo zebol mu lol nr nga, nia leil Arbosobo ddei anix loxr lol arddeir a. Arbosobo ddei Xiu ddei niul leil Arbosobo leil “Abaxl,^b Arbbor,” eine ae lol. ¹⁶ Arbosobo ddei Xiu ddei nei niul ddei xiu ddei lei niul leil saexl lol, niul mel Arbosobo ddei anix a. ¹⁷ Niul Arbosobo ddei anix nga a mel dder yar niul leil gger mel li wo ddo, hherdder niul Zidu dax cirgo a Arbosobo yar leil gger mel li wo ddo. Niul yarzi Zidu dax cirgo a goxr sol arddeirnga a, niul dder Zidu dax cirgo a middux, bbobbolbbo zza.

Eilni Arggeni Middux Nei Bbobbolbbo Zza

¹⁸ Ngo zzir dae a, niul eilleix goxr sol dae eil mel mel arddolcar a Arbosobo niul leil middux lol, bbobbolbbo zza lol hal mel dax bir lei bir nr piar. ¹⁹⁻²⁰ Ca mel zuixl bei a Arbosobo coxl teixl lei hazza-hamaer leil nr seir lol. Coxl teixl lei hazza-hamaer leil nr seir lol a mel yaa armael xiar

^b**8:15** *Abaxl* Arbosobo Ddei Sul vaexr beil ber gga hherdder Xilaxl ddar vaexr dae a bbeix “Abaxl.” Abaxl ddei yilsi mel dder Arbbor.

dae nr nga, Arbosobo xiar dae mel dax zox dae arddeir a. Yel coxl teixl lei hal mel zabbar seirseir a xia dae a arseir saelnei Arbosobo ddei aniux a saexl loxia.²¹ Hane ci a mel yaa leil lei dder zebol mel sael a piur teixl lei a; Arbosobo ddei aniux mel sael a armael lo zza, seirceix-seirmaer loxr a. Yaa zeixleixr si nr var, xiaxr nr var.

²² Niul lei saexl, coxl teixl lei hazza-hamaer mel eilleix zzezze lei nolir ae dae.²³ Coxl teixl lei mel lar eine bei dae nr nga a nei, niul Arbosobo ddei Xiu ddei nixmox zzar hher ji dae su ca mel lei nixmox zzar yarzi zzasol. Niul yarzi sael Arbosobo niul leil yar ddei aniux bei lol, niul ddei ggecir ddei leil zuixl gga nei yarzi goxr sol hal mel gga jiuxl teixl lei loxia. Arbosobo yar ddei Xiu ddei niul leil gger a mel, niul leil arddolcar a eine nga saexl lol.²⁴ Niul eine nga loxia dae a, niul leil jiuxl wo a. Niul li wo ho hal mel leil mel li wo lo-nr-xia. Arseir yar zza ho hal mel leil li wo loxia var bbeixleir?²⁵ Nael niul li nr wo seir hal mel li wo loxia arddeirnga a mel, niul dder ssertexr-zzazza arla xia dae.

²⁶ Ciryoxr a nga, niul bei ci nr xie car a, Arbosobo ddei Xiu ddei niul leil beijjiu. Niul Arbosobo dax ddar biar a arsae biar nia nr saexl car a, Arbosobo ddei Xiu ddei mel niul biar teixl lei nr xie ddar hal mel niul leil Arbosobo dax qiuxr gger.²⁷ Arbosobo ddei Xiu ddei mel, Arbosobo xiar dae ddei dax zox dae a, Arbosobo ddei cassor-worssor mel leil qiuxr gger. Yel Arbosobo mel niul nixmox zzar arsae xiar dae nei yar ddei Xiu ddei arsae xiar dae lei saexl.

²⁸ Niul lei saexl, Arbosobo mel yar leil perniar su mel leil weix a cirza-hanga lei seirseir loxr lol. Ca eil mel mel dder Arbosobo armael xiar dae mel dax zox dae a, tiur teixl lei ca mel nga a.²⁹ Ca eil mel leil xiu nr teixl lei seir dder Arbosobo yaa leil saexl ho a; halae yaa leil yar Ssor ddei dax ciryoxr a nga lol nia dixl har ho a. Yel yar ssor leil yar aniux mel gga ssor vaer zzir ddei bei lol.³⁰ Arbosobo dixl har zaxr dae

yar ddei aniux bei lol ca mel mel, yar yaa leil tiur teixl lei a; yoxl yaa leil zuixl nr zza i mal gger, halae yaa leil yar dax cirgo a middux lol.

³¹ Eine nga a, niul azo bbeixddu zza neil? Arbosobo niul leil beijjiu dae mel arseir niul leil dir leixl gger xie bbeixleir? ³² Arbosobo yar Ssor ddei leil lei niul leil olga dir gger lol vixr mel, yar gielgiel hazza-hamaer lei niul leil meixl gger vixr zzarmar? ³³ Arbosobo mel tiur har dae ca mel leil zuixl nr zza i mal gger ho a. Yel arseir yaa leil goxl ssi cexr bbeixleir?

³⁴ Yisu Zidu mel niul ddei zuixl mel leil weix a si a yoxl gol du xixl lei ho a, Arbosobo yo piar a gga cux dae a, niul leil Arbosobo dax ddar biar gger dae. Yel arseir niul leil zuixl zza dil gger cexr bbeixleir? ³⁵ Arseir niul leil Zidu dax bbe kae gger cexr, yar leil niul leil per-nr-niar lol bei cexr bbeixleir? Holbbaexl goxrsol-goxrnaxr hal mel a ngo? Bbeixsael si niul leil ke hal mel a ngo? Zzorddu nr zza hal mel a ngo? Veixrddu nr zza hal mel a ngo? Niul leil si lol var hal mel a ngo? ³⁶ Hherdder Arbosobo Ddei Sul ber leil vaexr mel sael a nga, bbeix:

“Ngu a mel ni ddei cassor-worssor nga a,
merxixl-merni lei si ngua leil seixl,
hherdder acixl ya seixl mel sael a nga.”^c

³⁷ Nael niul leil perniar su Seirpor ddei leil koxl dae a, niul eil mel maelmaerjia leil bei leixl var. ³⁸ Ngo hazzi ddarzzi, azo lei niul leil Arbosobo dax bbe kae gger nr cexr, yar leil niul leil per-nr-niar lol bei nr cexr. Si bbeixsael gol, tisir bbeixsael neir, eilleix bbeixsael arddolcar a, bbeixsael ddoddomo hal mel, ³⁹ mu ggie bbeixsael mi ax ggie, merlo-milo maelmaerjia hazza-hamaer lei niul leil Arbosobo dax bbe kae gger nr cexr. Arbosobo Seirpor Yisu Zidu bei dae mel leil ngol dae a, ca leil

^c8:36 Sipi Sul 44:22 leil vaexr dae.

perniar.

9

Arbosobo Yirsaexllixl Su Ca Mel Leil Tiur

¹ Ngo mel Zidu dax cir piar a nga a, ngo nia dax ddarzi bbeix, nia leil nr fur. Arbosobo ddei Xiu ddei ngo nixmox zzar hher ji dae a ngo leil guaxr dae, yel ngo bbeix dae mel yarzi a. ² Yoxrtaexl su ca mel Yisu Zidu leil ddar-nr-zzi a ngo yarzi sael cix, arddolcar lei nixmox zzar hazzi zzasol.

³ Ngo, ngo ddei arzzi-nimar hherdder ngo dax cir mermi su ca mel leil jiuxl wo lol niazzir a, Arbosobo ngo leil vuxryixr, ngo leil Zidu dax bbe kae lol zzorbbeixlei, ngo bei yuex. ⁴ Yaa mel Yirsaexllixl su ca a.

Arbosobo lei yaa leil yar ddei ssormine loxr lol, yaa leil Arbosobo yarzi ddo yarzi quexrlixl zza mia lol, halae yaa dax yaa leil arsae lerler seir lol nia bbeix har zaxr; yaa leil Lixlfaxr gger, yaa leil Arbosobo ddei xi gga Arbosobo leil zi lol; halae Arbosobo yaa leil gger nia bbeix har zaxr goxr mel lei yaa ddei a. ⁵ Yaa mel Yalboxrlahar, Yirsar, Yargel ddei lilbol-lilmo a. Yisu Zidu mel yaa dax ddux lei. Yar mel hazza-hamaer leil lei vaer leixl Arbosobo ddei nga a. Cirse-cirsil lei yar leil bbeix zae gger nia. Amae!

⁶ Yirsaexllixl su ca cirmelmel a Arbosobo ddei cassor-worssor nr nga bbeixarnar, nael Arbosobo yaa leil bbeix har zaxr goxr ddar mel halae yarzi loxr var. ⁷ Yalboxrlahar giedae ca maelmaerjjia lei Arbosobo ddei ssormine a nr nga. Arbosobo halleix Yalboxrlahar dax bbeix a bbeix: “Yirsar xiu teixl lei mel saelnei ni giedae ca suax.”^d ⁸ Eil ddei mel dder bbeix, Yalboxrlahar xiu teixl lei anixl hanga dder Arbosobo ddei anixl nr nga, Arbosobo bbeix har zaxr goxr anixl mel saelnei yarzi

^d9:7 Cuaxlsixljil Sul 21:12 leil vaexr dae.

Yalboxrlahar ddei giedae ca suax. ⁹ Arbosobo bbeix har zaxr goxr a bbeix: “Nolxiexr eilleix ci a, ngo jjixr lei nia, Sala ssor ar ddox xiu nia,”^e eine bbeix a.

¹⁰ Eine lar nr nga a nei, Lixlbaexrjia ddei ssor nnel lei arbbor cirddeir dax a xiu, hherdder niul ddei porpor Yirsar dax xiu a. ¹¹⁻¹² Nael Lixlbaexrjia ssor nnel leil xiu nr teixl lei seir, yaa seirseir bbeixsael nr seir lei nr bei, Arbosobo Lixlbaexrjia leil bbeix: “Ssor vaervaer ddei ssor yelye ddei leil visser nia.”^f Arbosobo yar leil eine bbeix a mel ca mel leil saexl lol, Arbosobo ca mel leil tiur a mel, yaa bei dae mel dax zox dae a tiur nr nga a nei, yar xiar dae mel dax zox dae a tiur arddeir a.

¹³ Hherdder Arbosobo Ddei Sul ber leil vaexr dae mel sael a nga, bbeix: “Ngo Yargel leil perniar, Yirseixr leil vuxryixr,”^g eine bbeix a.

¹⁴ Halmel, niul dder Arbosobo mel bbae-nr-hhex bbeix ddo a ngo? Bbeix nr ddo mar! ¹⁵ Arbosobo Moxrxi dax bbeix:

“Ngo arseir leil zoxlnixr niazzir mel dder arseir leil zoxlnixr,
arseir leil perniar niazzir mel dder arseir leil perniar,”^h

eine bbeix a.

¹⁶ Yel Arbosobo ca leil tiur teixl lei a mel, yaa xiar dae nei bei dae mel dax zox dae nr nga, yar ca mel leil zoxlnixr a nga arddeir a. ¹⁷ Arbosobo Ddei Sul ber gga, Arbosobo Aezixr goxrjia zzirmar Faxrlar dax bbeix:

“Ngo ni leil zzirmar bei lol a mel,

^e**9:9** Cuaxlsixljil Sul 18:10, 18:14 leil vaexr dae.

^f**9:11-12** Cuaxlsixljil Sul 25:23 leil vaexr dae.

^g**9:13** Malaji Sul 1:2-3 leil vaexr dae.

^h**9:15** Cu'aezixr Sul 33:19 leil vaexr dae.

ca mel ni leil mia a dder
ngo yarzi ddo saexl a,
ngo leil mer woxrke middux lol var.”ⁱ

¹⁸Yel Arbosobo arseir leil zoxlnixr niazzir mel arseir leil zoxlnixr; arseir leil nixmox gex lol niazzir mel dder arseir nixmox gex.

¹⁹Nael nia ngo leil bbeix: “Halmel, Arbosobo arsaenga a halae ca leil bota leir? Arseir yar xiar dae mel leil dir cexr bbeixleir?” ²⁰Ni arseir a leir? Arbosobo leil ddarkoxl, yar dax dir bel. Bei teixl lei ddei mel arsaeng yar leil bei su ddei leil bbeix: “Ni arsaenga a ngo leil eine arddeir bei mal gger leir?”^j Eine bbeix cexr a ngo? ²¹Niljiux ddei mel nilhar vei si lei a yar arsaeng bei niazzir mel dder arsaeng bei cexr. Yar nilhar sser a zzaegu naxrcixlcixlmo ar yoxr bei nei ggiexrtaextaexmo ar yoxr bei nr cexr a ngo?

²²(Ciryoxr a nga, Arbosobo ca mel leil arsaeng guaxr niazzir mel dder arsaeng guaxr cexr.) Yar zuixl bei su ca mel leil sirzzi a yaa leil faxr nia, yaa leil dixlyuxl gga ssi lol nia. Yar eine bei a mel ca mel leil yar yarzi sirzzi, yarzi ddo saexl lol cexr bbeixarnar, yar halae zuixl dixl gger ho ca mel leil yarzi ssertexr zza. ²³Yar eine ssertexr zza a mel, yar zoxlnixr dae ca mel leil yar yarzi middux saexl lol. Ca eil mel mel dder Arbosobo arddolcar a yaa leil middux lol nia dixl har dae mel nga a. ²⁴Niul lei yar tiur teixl lei ca mel a. Arbosobo tiur teixl lei ca mel Yoxrtaexl su lar nr nga, Yoxrtaexl su nr nga ca mel lei ca dae. ²⁵Yoxrtaexl su nr nga ca mel leil bbeix ci a mel hherdder xiezi Hexrxi'a vaexr dae Arbosobo Ddei Sul ber leil bbeix dae mel sael a nga, Arbosobo bbeix:

ⁱ9:17 Cu'aezixr Sul 9:16 leil vaexr dae.

^j9:20 Yirsaexlyal Sul 29:16 nei 45:9 leil vaexr dae.

“Ngo ddei cassor-worssor nr nga ca hal mel,
ngo yaa leil ngo ddei cassor-worssor a bbeix nia;
ngo perniar dae nr nga ca hal mel,
ngo yaa leil perniar nia.”^k

²⁶ Arbosobo yoxl bbeix

“Halleix ngo arddolmaex gga yaa dax bbeix
‘nia ngo ddei cassor-worssor nr nga,’
arddolcar a yoxl halmaex gga yaa leil bbeix,
‘nia cirse-cirsil lei gol dae Arbosobo ddei ssormine a’ eine bbeix
nia.”^l

²⁷⁻²⁸ Yirsaexllixl su ca mel leil bbeix ci a mel, xiezi Yirsaexlyal ae dae a
bbeix:

“Seirpor mel cirleixr dder middurbbor ca leil ser jjia gaxzi a;
yel Yirsaexllixl su ca mel neixvi qier leil sa mel sael a miur
bbeixarnar,
nael jiuxl wo su ca mel yarzi nganiul.”^m

²⁹ Yoxl Yirsaexlyal halleix bbeix goxr mel sael a nga, bbeix:

“Yarzi ddo Seirpor ddei niul leil giedae ca armel nr zza lol arddeirnga
a,
niul dder Sordomar zzi nei Exrmoxrla zziⁿ gga ca mel sael a nr zza

^k9:25 Hexrxi'a Sul 2:23 leil vaexr dae.

^l9:26 Hexrxi'a Sul 1:10 leil vaexr dae.

^m9:27-28 Yirsaexlyal Sul 10:22-23 leil vaexr dae.

ho a.”^o

Yirsaexllixl Su Ca Yisu Leil Ddar-nr-zzi

³⁰ Halmel, niul halae azo bbeixddu zza neil? Yoxrtaexl su nr nga ca mel Arbosobo dax toltor a bei nia-nr-zzir zzael, yaa Arbosobo leil ddarzzi a yaa leil zuixl nr zza i mal gger; ³¹ nael Yirsaexllixl su ca mel Lixlfaxr ddei dax bei mae dae a, Arbosobo dax toltor a bei niazzir zzael, Arbosobo yaa leil zuixl nr zza i mal nr gger. ³² Arsaenga a eine nga neil? Yaa mel ddarzzi dae ddei leil koxl dae nr nga a nei, yaa armael bei dae mel leil koxl dae a nga arddeir a. Yel yaa dder qihher ddei leil baxl guirle var legelbbe taex leil baxl guirle dae a.^p ³³ Hherdder Arbosobo Ddei Sul ber leil vaexr dae mel sael a nga, bbeix:

“Ngo Xi'a zzi gga ca leil cidir zuax lol var legelbbe ar taex dol dae,
legelbbe eil taex ca leil baxl guirle lol,
yar leil ddarzzi su ca mel seixlda nr var,”^q

eine bbeix a.

10

¹ Arzzi-nimar arzzi-nimo mel, ngo nixmox zzar mel yarzi sael Yirsaexllixl su ca mel leil jiuxl wo loxia a, ngo yaa leil Arbosobo dax ddar

ⁿ9:29 *Sordomar zzi nei Exrmoxrla zzi Cuaxlsixljil* Sul 19 leil biar dae.

^o9:29 Yirsaexlyal Sul 1:9 leil vaexr dae.

^p9:32 Legelbbe eil taex mel hherdder Yisu Zidu leil bbeix. Yar leil ddar-nr-zzi a mel dder Arbosobo dax toltor a nga nr var. Yar leil ddarzzi a nael toltor a nga var. Birdaexr Sul Vaexr Beil Ber gga 2:4-8 leil biar dae.

^q9:33 Yirsaexlyal Sul 8:14 nei 28:16 leil vaexr dae.

biar gger. ² Yaa mel zabbar seilseir a Arbosobo dax bei mae niazzir, nael yaa arsae bei nia nr saexl, ngo ca mel dax yaa leil eine biar gger cexr.

³ Arbosobo Yisu bei dae mel leil ngol dae a ca leil zuixl nr zza i mal gger eil ddei leil yaa ddarzzi nr yuex, doxgoxleixr yaa Lixlfaxr dax bei mae dae a Arbosobo yaa leil zuixl nr zza i mal gger lol niazzir. Yel yaa Arbosobo ddei ddar no-nr-ni. ⁴ Zidu mel ca leil weix a si a, yel Yisu leil ddarzzi su ca mel zeixleixr Lixlfaxr dax bei mae dae a Arbosobo yaa leil zuixl nr zza i mal gger lol nr ssa.

⁵ Lixlfaxr leil koxl dae a zuixl nr zza i mal gger ddei leil bbeix ci a mel, Moxrxi bbeix, Lixlfaxr leil miardal dae mel maelmaerjjia bei ci nia. ⁵ Eine nga a saelnei cirse-cirsil gol dae cexr. ⁶ Nael Zidu leil ddarzzi a, zuixl nr zza i mal gger ddei leil bbeix ci a mel, Moxrxi yoxl bbeix: “Ni nixmox zzar ‘arseir merlabbor ddeix?’ eine bbeix nr ddo.”^t “Arseir merlabbor ddeix” eine bbeix a mel hherdder Zidu leil middurbbor hier ze lei a. ⁷ Moxrxi zeixleixr bbeix “Arseir ca si ho a hher ggie ze?”^u eine bbeix nr ddo. “Arseir ca si ho a hher ggie ze” eine bbeix a mel hherdder Zidu leil ca si ho a hher ggie hier deix lei a. ⁸ Moxrxi halae azo bbeix neil? Yar bbeix:

“Arbosobo ddei ddar mel ni dax giex vi-nr-mir dae a.

Ni meir ddei gga nei ni nixmox zzar hher ji dae a.”^v

Ddar eil qier mel dder niul biar dae Zidu leil ddarzzi a, zuixl nr zza i mal gger hal qier nga a.

⁹ Ni meir ddei gga “Yisu mel Seirpor a” cexrssexl halae nixmox zzar

^s10:5 Lixlweixljil Sul 18:5 leil vaexr dae.

^t10:6 Semixljil Sul 30:13 leil vaexr dae.

^u10:7 Semixljil Sul 30:13 leil vaexr dae.

^v10:8 Semixljil Sul 30:14 leil vaexr dae.

Yisu si a Arbosobo yoxl yar leil gol du xixl lei lol eine ddarzzi a mel, ni leil dder jiuxl wo ddo. ¹⁰ Niul nixmox zzar Zidu leil ddarzzi dae a mel dder Arbosobo niul leil zuixl nr zza i mal gger. Niul meir ddei gga “Yisu mel Seirpor a” cexrssexl a mel dder niul leil jiuxl wo a. ¹¹ Arbosobo Ddei Sul ber leil bbeix dae a bbeix: “Ha yar leil ddarzzi su ca mel dder seixlda nr var.”^w ¹² Yoxrtaexl su nei Yoxrtaexl su nr nga ca mel lei ciryoxr a nga. Arbosobo mel ca maelmaerjjia ddei Seirpor, yar leil qiuxr su ca maelmaerjjia yar dder yaa leil daxlgaxl-daxllixl seir lol. ¹³ Eine nga a hherdder Arbosobo Ddei Sul ber leil bbeix dae mel sael a nga: “Ha Seirpor ddei leil qiuxr su ca mel, yaa leil jiuxl wo nia,”^x eine bbeix a.

¹⁴ Nael ca mel Seirpor leil ddar-nr-zzi a mel, arsae yar leil qiuxr cexr bbeixleir? Ca mel zeixleixr lei noni wo nr seix a mel, arsae ddarzzi cexr bbeixleir? Arbosobo ddei ddar biar gger ssi su nr zza a mel, ca mel arsae noni cexr bbeixleir? ¹⁵ Ca leil miardal nr teixl si a mel, yaa arsae Arbosobo ddei ddar mel ca leil biar gger ssi cexr bbeixleir? Hherdder Arbosobo Ddei Sul ber leil vaexr dae mel sael a nga, bbeix: “Ddar seirseir mel ca leil biar gger su ca mel arddol ssi ci lei, halmaex gga ca mel yaa leil yarzi sael ggese!”^y

¹⁶ Nael ca mel ddar seirseir noni ho a maelmaerjjia lei ddarzzi nr nga. Yirsaexlyal halleix bbeix goxr mel sael a nga. Yar bbeix: “Seirpor, arseir ngua ddar biar gger dae mel leil ddarzzi lei bbeixleir?”^z ¹⁷ Zidu ddei ddar seirseir mel biar teixl lei a saelnei ca mel yar ddei ddar mel leil noni cexr. Ca mel noni ho a saelnei yar leil ddarzzi cexr. ¹⁸ Nael ngo arleixr biex: Holbbaexl Yirsaexllixl su ca mel ddar eil mel noni wo nr goxr a ngo? Noni

^w**10:11** Yirsaexlyal Sul 28:16 leil vaexr dae.

^x**10:13** Yue'aer Sul 2:32 leil vaexr dae.

^y**10:15** Yirsaexlyal Sul 52:7 leil vaexr dae.

^z**10:16** Yirsaexlyal Sul 53:1 leil vaexr dae.

wo goxr a mar. Hherdder Arbosobo Ddei Sul ber leil vaexr dae mel sael a nga, bbeix:

“Yaa ddei qiurte ddei mel mer woxrke cirmaex-hanga bbejjiur a;
Yaa ddei ddar mel middurbbor cirmaex-hanga biar jiax a.”^a

¹⁹ Ngo zeixleixr biex: Holbbaexl Yirsaexllixl su ca mel yarzi nr saexl a ngo? Moxrxi vaexr dae sul gga Arbosobo bbeix:

“Ngo, ngo ddei cassor-worssor nr nga ca hal mel leil sser a,
nia leil nixnox lol nia,
ngo halae ngo ddei ddar mel nr saexl su ca hal mel leil sser a,
nia leil sirzzi lol nia.”^b

²⁰ Yoxrtaexl su nr nga ca mel leil bbeix ci a mel Yirsaexlyal yoxl nixmox vaervaermo bbeix goxr a bbeix:

“Ngo^c leil nr zo su ca mel, ngo yaa leil ngo leil zo wo lol ho a;
ngo leil nr qiuxr su ca mel, ngo yaa leil ngo leil saexl lol ho a.”^d

²¹ Nael Yirsaexllixl su ca mel leil bbeix ci a mel, Arbosobo bbeix:

“Ngo cirni-lorbba leixrhher zze cei teixl lei a yaa leil seir lol,
nael yaa ngo ddei ddar nr no, ngo leil dir.”^e

^a10:18 Sipi Sul 19:4 leil vaexr dae.

^b10:19 Semixljil Sul 32:21 leil vaexr dae.

^c10:20 Ngo Ngo mel dder Arbosobo leil bbeix.

^d10:20 Yirsaexlyal Sul 65:1 leil vaexr dae.

^e10:21 Yirsaexlyal Sul 65:2 leil vaexr dae.

11

Arbosobo Yirsaexllixl Su Ca Mel Leil Piar Nr Pixl

¹ Halmel, ngo arleixr biex: Arbosobo mel yar ddei cassor-worssor hherdder Yirsaexllixl su ca mel leil piar pixl gger a ngo? Nr nga mar. Ngo armael lei Yirsaexllixl su ca arddeir a. Ngo mel Yalboxrlahar giedae ca, Bixlyarmir mi ca hal ddei dax cir cuxr a. ² Arbosobo mel yar halleix dder tiur har zaxr dae yar ddei cassor-worssor mel leil piar nr pixl. Arbosobo Ddei Sul ber gga xiezi Yirlixlyal arsae bbeix dae nia lei saexl zzarmar? Yar Arbosobo dax Yirsaexllixl su ca mel leil arsae goxl dae, yar bbeix: ³ “Seirpor, yaa mel ni ddei xiezi mel leil seixl zil gger, ni leil zi ggjie mel caexr pixl gger; ngo cirmuzil lar nga a lei, yaa halae ngo leil seixl niazzir,”^f eine bbeix a. ⁴ Nael Arbosobo yar leil arsae ddarkoxl a neil? Arbosobo bbeix: “Ngo armael leil ca sirdu dol gger dae, ca eil mel mel Balixl neir ddei leil cizixl gger nr seix,”^g eine bbeix a. ⁵ Yel eilboxl eilleix lei eine nga. Arbosobo Yirsaexllixl su ca mel gga armel tiur teixlleil a yaa leil cirza-hanga seirseir meixl gger, Zidu leil ddarzzi lol. ⁶ Arbosobo ca leil tiur teixl lei a mel, yaa arsae lerler bei dae mel dax zox dae nr nga a nei, Arbosobo yaa leil cirza-hanga seirseir meixl gger a nga arddeir a. Nael Arbosobo ca leil tiur teixl lei a, yaa arsae lerler bei dae mel dax zox dae a tiur arddeirnga a mel, Arbosobo dder yaa leil seirseir meixl gger nr nga.

⁷ Halmel, arsae nga neil? Yirsaexllixl su ca cirke a Arbosobo leil zo a yar dax toltor a nga niazzir dae zrael zo nr wo, nael Arbosobo Yirsaexllixl su ca mel gga tiur teixl lei dae hal mel zrael zo wo a. Zo nr

^f**11:3** Zzirmar Sul Xilmeir Vaexr hal ber 19:10 nei 19:14 leil vaexr dae.

^g**11:4** Zzirmar Sul Xilmeir Vaexr hal ber 19:18 leil vaexr dae.

wo hal mel nael Arbosobo leil noni dil nr ddo ca loxr a; ⁸ hherdder Arbosobo Ddei Sul ber leil vaexr dae sael a nga, bbeix:

“Eilleix ci a lei Arbosobo yaa leil xiar nr saexl lol,
meixddur mia nr xie lol,
nolba bbejjiur nr xie lol.”^h

⁹ Daxlweixl lei bbeix:

“Yaa zzorci-ddami zzor ggje mel yaa leil bel gex ggje loxr lol nia;
yaa ddei cirza-hanga seirseir mel yaa leil baxl guirle lol nia;
yaa si leil arsae bei Arbosobo yaa leil arsae bei koxl xixl lol nia;
¹⁰ yaa leil meixdae lol nia, mia nr xie lol nia;
yaa leil arddolcar lei zzoxrbbeix ddei olmermermo nga lol nia,”ⁱ
eine bbeix a.

¹¹ Ngo bbeix: “Holbbaexl Yoxrtaexl su ca mel zuixl bei a mel yaa dder maelmaerjia Arbosobo dax bbe kae gaxzi a ngo?” Nr nga mar!
Doxgoxleixr yaa zuixl bei a, Yoxrtaexl su nr nga ca mel leil dder jiuxl wo a. Yel Yoxrtaexl su ca mel leil nixnox lol. ¹² Nael Yoxrtaexl su ca mel zuixl bei a, mer woxrke ca mel leil daxlgaxl-daxllixl seir lol a; yaa Arbosobo dax seir nr xixl a, Yoxrtaexl su nr nga ca mel leil daxlgaxl-daxllixl seir lol a; Arbosobo Yoxrtaexl su ca leil jiuxl jjia a gielgiel mer woxrke ca mel leil seir lol a zzarmar?

¹³ Ngo nia Yoxrtaexl su nr nga ca mel dax ddar biar. Ngo mel Yisu Zidu miardal dae ca a. Ngo yar ddei ddar seirseir mel Yoxrtaexl su nr nga ca

^h**11:8** Semixljil Sul 29:4 nei Yirsaxlyal Sul 29:10 leil vaexr dae.

ⁱ**11:10** Sipi Sul 69:22-23 leil vaexr dae.

leil biar gger ssi su ddei nga a. Ngo, ngo bei dae miar eil mel leil hazzi i du, ¹⁴ yel ngo dax cir mermi su ca mel leil nixnox lol a, yaa ca mel gga armel leil jiuxl wo lol. ¹⁵ Arbosobo yaa leil ggaxr teixl gger arddeirnga a, mer woxrke cassor-worssor mel dder Arbosobo dax toltor a nga; Arbosobo yaa leil zo xixl lei arddeirnga a, arsaesael nga var? Si ho ca mel dder gol du xixl lei var. ¹⁶ Arbosobo leil zilabox niux har dae aba bex mel seirceix-seirmaer nga arddeirnga a, cirtaex-lorbba lei dder seirceix-seirmaer a. Sixzzei yarji ddei seirceix-seirmaer nga arddeirnga a, sixzzei yarbaxlleixr mel lei dder seirceix-seirmaer a.^j

¹⁷ Saercor zzei yarmir yarbaxlleixr mel ngaxl zeil lei a, saercor zzei yaryir yarbaxlleixr mel yarmir zzei leil zeixl ngexl gger a, yel saercor zzei yarji mel dax seirseir mel li wo. (Saercor zzei yarmir yarbaxlleixr mel Yoxrtaexl su ca mel nga a.) Saercor zzei yaryir yarbaxlleixr mel Yoxrtaexl su nr nga ca mel nga a. ¹⁸ Yel ni yarbaxlleixr ngaxl zeil lei hal mel leil i zeil nr ddo. Ni lei yarbaxlleixr lar nga zzarmar? Ni sixzzei yarji ddei leil ba dae nr nga a nei, sixzzei yarji ddei ni leil ba dae arddeir a. ¹⁹ Nael ni bbeix: “Yarbaxlleixr hal baxl ngaxl zeil lei a mel ngo leil zeixl ngexl lol niazzir a nga arddeir a,” eine bbeix. ²⁰ Eine lei doxl bbeix hoxr a. Nael yaa mel Yisu leil ddar-nr-zzi a, yaa leil dder ngaxl zeil lei a. Ni mel Yisu leil ddarzzi a, ni leil zeixl ngexl gger a. Nael ni olvaer nr ddo, Arbosobo leil gexr nia. ²¹ Arbosobo halleix ddei yarbaxlleixr mel leil lei kor-nr-seil mel, ni leil lei korseil nr var.

²² Yel niul dder Arbosobo mel ca cirmemel leil a guaxr larhor, ca cirmemel leil a zoxlnixr saexl ddo. De zeil su ca, hherdder Yisu leil

^j**11:16** Ca cirmemel a zzir dae a Arbosobo leil zilabox aba bex nei sixzzei yarji mel dder Yoxrtaexl su ddei porpor hherdder Yalboxrlahar, Yirsar, Yargel yaa nga a. Aba bex taex nei sixzzei yarbaxlleixr mel dder yaa ddei giedae ca.

ddar-nr-zzi Yoxrtaexl su ca mel leil nael yar yarzi guaxr larhor yaa ddei yarbaxlleixr mel ngaxl zeil gger, ni leil nael zoxlnixr. Nael ni Yisu leil ddarzzi nr doxr dae arddeirnga a, ni leil lei yarmir zzei ddei leil ngaxl zeil lei nia. ²³ Yoxrtaexl su ca mel leil bbeix ci a nael, yaa Yisu leil ddarzzi arddeirnga a, yaa leil dder zeixl ngexl xixl gger. Arbosobo mel yaa leil zeixl ngexl xixl gger bbesur zza. ²⁴ Arbosobo mel ni leil saercor zzei yaryir leil ngaxl zeil lei a saercor zzei yarmir leil zeixl ngexl gger. Halmel, Arbosobo saercor zzei yarmir leil ngaxl zeil lei yarbaxlleixr mel halmaex zeixl ngexl xixl gger a gielgiel bei ci xie zzarmar?

²⁵ Arzzi-nimar arzzi-nimo, halleix ca mel saexl nr goxr ddarzi mel eilleix ngo nia leil saexl lol niazzir. Nr nga a, nia zzir dae a nia hazzi jilixr. Ngo nia leil saexl lol mel dder: eilleix Yirsaexllixl su ca cirmelmel a Arbosobo ddei ddar noni dil nr ddo bbeixarnar, nael Arbosobo jiuxl niazzir dae Yoxrtaexl su nr nga ca mel leil jiuxl jjia gaxzi a saelnei

²⁶ Yirsaexllixl su maelmaerjjia leil lei jiuxl wo. Hherdder Arbosobo Ddei Sul ber leil vaexr dae sael a nga, Arbosobo bbeix:

“Ca leil jiuxlsu Seirpor ddei Xi'a zzi gga ddux lei nia;^k
yar mel Yirsaexllixl su ca

hherdder Yargel giedae ca mel leil ngo leil i du box lol nia.

²⁷ Ngo yaa ddei zuixl mel bei pixl gger nia;

eil ddei mel dder ngo yaa dax bbeix har zaxr dae ddei nga a,^l

eine bbeix a.

^k**11:26** *Ca leil jiuxlsu Seirpor ddei Xi'a zzi gga ddux lei nia* Ddar eil qier ddei yilsi mel dder ca leil jiuxlsu Seirpor ddei 1) Yiluxlsaler zzi gga ddux lei nia, 2) merlabbor zeil lei nia, 3) Yoxrtaexl su mel gga ddux lei nia.

^l**11:27** Yirsaexlyal Sul 59:20-21 nei 27:9 nei Yilixlmir Sul 31:33-34 leil vaexr dae.

²⁸⁻²⁹ Yirsaexllixl su ca hherdder Yoxrtaexl su ca mel ddar seirseir mel leil ddar-nr-zzi a, Arbosobo leil dir su ca loxr a. Eil ddei mel nia dax seirggiebbæer zza. Arbosobo ca leil tiur nei ca leil seirseir meixl gger dae mel mel gierbox nixixl nr zza. Yel yar Yoxrtaexl su ca mel ddei porpor mel dax bbeix har zaxr goxr a, yar halæe Yoxrtaexl su ca mel leil perniar.

³⁰ Halleix nia Arbosobo ddei ddar nr no. Eilleix Yoxrtaexl su ca mel lei Arbosobo ddei ddar nr no a, yel Arbosobo nia leil zoxlnixr. ³¹ Ciryoxr a nga, Arbosobo nia leil zoxlnixr a, yel eilleix Yoxrtaexl su ca mel Arbosobo ddei ddar nr no bbeixarnar, Arbosobo halæe yaa leil zoxlnixr.

³² Arbosobo mel cassor-worssor maelmaerjjia leil yar ddei ddar nr no lol, eine nga a mel yar yaa leil zoxlnixr cexr.

Arbosobo Leil Bbeix Zæe Gger

³³ Arbosobo mel cirza-hanga lei yarzi sæel be!

Yar yarzi olnołddu, yarzi jilixr, yar nr sæexl lei ar yoxr nr zza!
Yar arsæe xiar ji dae nei arsæe bei niæzzir dae mel ca mel sæexl nr var!

³⁴ Seirpor arsæe xiar ji dae mel arseir sæexl bbeixleir?

Arseir yar leil arsæe bei nia bbeix gger cexr bbeixleir?^m

³⁵ Arseir yar leil azo gger a, yar koxl nr gger goxr nr ddo zza
bbeixleir?ⁿ

³⁶ Hazza-hamaer lei yar bei teixl lei, yar guaxr dae.

Eil mel mel yar leil weix a bei teixl lei arddeir a.
Arbosobo leil cirse-cirsil lei quexrlixl zza lol nia! Amæe!

12

^m11:34 Yirsaexlyal Sul 40:13 leil vaexr dae.

ⁿ11:35 Yueboxr Sul 41:11 leil vaexr dae.

Arbosobo Leil Weix A Gol Dae

¹ Yel arzzi-nimar arzzi-nimo mel, ngo nia leil quex, Arbosobo niul leil einezeixl zoxlnixr a mel, nia Arbosobo leil weix a gol dae nia. Nia mel dder Arbosobo leil zilabox gol dae hal mel sael a nga.^o Nia seirceix-seirmaer nga nia, Arbosobo leil ggese lol nia. Nia eine bei a mel, yarzi Arbosobo leil zi dae. ² Nia mer woxrke ca mel dax bei mae nr ddo. Arbosobo leil nia nixmox zzar xiar dae mel gierbox gger lol a, ca mu box nia. Nia dder Arbosobo nia leil azo bei lol saexl var, hherdder arddol mel seir, arsae bei a Arbosobo dax nixloxdda, arsae bei a saelnei bei hoxr gaxzi.

³ Arbosobo mel ngo leil seirseir meixl gger a yar ddei ddar mul gger lol a ngo nia cirddeir-hanga leil bbeix gger: nia armael leil piuper-saeper i mal gger nr ddo. Arbosobo nia leil arsae ddarzzi lol mel dax zox dae a hoxrsil sael a ddo. ⁴ Ca ggecir arddeir leil mel hormo yoxr nei niar dae, ciryoxr-hanga lei armael sser ggie zza. ⁵ Ciryoxr a nga, niul Zidu leil ddarzzi su mel, ca cirke a ggecir cirddeir a loxr sael a nga; cirddeir-hanga lei zzi dax niar gex dae.^p

⁶ Arbosobo niul leil seirseir meixl gger a, niul armael ddei armael bbesur zza. Arseir Arbosobo ddei ddar ca leil biar gger ssi bbesur zza arddeirnga a, yar dder yar ddarzzi dae mel dax zox dae a, biar gger ssi. ⁷ Ca leil visser bbesur zza arddeirnga a, yar dder zabbar seirseir a visser; ca leil mul gger bbesur zza arddeirnga a, yar dder zabbar seirseir a mul gger; ⁸ Ca leil quex bbesur zza arddeirnga a, yar dder zabbar seirseir a

^o**12:1** Halleix Yirsaexllixl su ca mel Arbosobo leil zi a mel, bbecir-bbeni Arbosobo leil zzeir seixl zi. Eilleix nael eine nr bei. Armael ca ddei yar leil jia ji gger a, yar leil visser.

^p**12:5** Gelixrdo Sul Vaexr Beil Ber 12:2-31 leil biar dae.

quex; ca leil azo lerler meixl gger bbesur zza arddeirnga a, yar dder hoxrcixlcixl a meixl gger; vaervaerpor bei bbesur zza arddeirnga a, yar dder zabbar seirseir bei; ca leil zoxlnixr bbesur zza arddeirnga a, yar dder ggegge-sese a zoxlnixr.

Yisu Leil Ddarzzi Su Ca Mel Nixixl Goxr A Arsae Bei Nia

⁹Ca leil perniar a mel perniar laexl nr ddo. Yarzi gexrddo nr seir hal mel leil vuxryixr nia; seirseir mel bei meixr nia. ¹⁰Nia zzicarzzi leil ca cir hhexr sael a perniar, zzicarzzi leil i du. ¹¹Bbae-nr-yo, zabbar seirseir a miar bei a nixmox cirtaex-lorbba Seirpor leil visser nia. ¹²Ggegge-sese arla Yisu leil jjixr lei loxia, goxrsol-goxrnaxr mel sser gex dae, arddolcar lei Arbosobo dax ddar biar nia. ¹³Arbosobo ddei cassor-worssor mel azo lerler sser zoxr a mel, yaa leil gger nia. Hoxrcixlcixlmo seivi mel leil hexl.

¹⁴Nia leil bixr su ca mel leil seir lol nia bbeix nia, hie no nr ddo. ¹⁵Ggese su ca mel dax cirgo a ggese, nge su ca mel dax cirgo a nge. ¹⁶Ca mel dax toltor a bei, armael nr col, azo ca dax lei bei hoxr ddo, armael azo lei saexl eine zzir nr ddo.

¹⁷Si ni leil nr seir bei a si leil nr seir bei koxl xixl nr ddo. Nia azo bei lei seirseir bei a, si leil ni bei hoxr saexl lol. ¹⁸Arsae bei var arsae bei a arseir dax lei toltor a bei. ¹⁹Ngo perniar dae arzzi-nimar arzzi-nimo mel, si nia leil nr seir bei a mel, nia bei koxl xixl nr ddo. Arbosobo sirzzi a nia leil nr seir bei su mel leil bei koxl xixl lol. Arbosobo Ddei Sul ber leil Seirpor bbeix:

“Bei koxl xixl su ddei mel ngo a;
ngo bei koxl xixl nia,”^q

eine bbeix a.

^q12:19 Semixljil Sul 32:35 leil vaexr dae.

²⁰ Eine lar nr nga a nei,

“Ni leil vuxryixr su mel meixr arddeirnga a, ni yar leil zol,
sixl arddeirnga a, ni yar leil da;
ni eine bei a mel dder adoxl bbiu dae saernir mel
yar oldde taex leil deix gger sael a nga,^s
hherdder yar yixrsixr nr zza a.”^t

eine bbeix a.

²¹ Ni, yarzi gexrddo, nr seir hal mel, ni leil bei leixl gger lol nr ddo,
doxgoxleixr seirseir mel bei a, ni yarzi gexrddo nr seir hal mel leil bei
leixl gger nia.

13

Quexrlixl Zza Su Ddei Ddar No

¹ Vaervaerpor ddei quexrlixl mel Arbosobo yaa leil zza lol a, ca
cirddeir-hanga lei vaervaerpor mel ddar no mibbe. ² Yel vaervaerpor leil
dir su ca mel mel dder Arbosobo leil dir a; ca eil mel leil serpaxl nia.

³ Vaervaerpor mel mel seirseir bei su ca mel leil gexr lol nr nga a nei, nr
seir bei su ca mel leil gexr lol arddeir a. Ni vaervaerpor dax nr gexr nga
niazzir zzir? Nga niazzir a mel ni seirseir bei nia, vaervaerpor ddei dder
ni leil kuar gger var. ⁴ Yar mel Arbosobo leil miar bei gger su a; yar ni leil
seir lol. Yar mel ni leil faxr quexrlixl zza, yel ni nr seir bei arddeirnga a,
ni dder yar leil gexr nia. Arbosobo yar leil vaervaerpor bei lol a mel, nr

^s**12:20** Halleix Yoxrtaexl su ca mel oldde ddei leil zzaegu bil zza wo.
Yaa zzir dae a ca leil saernir gger a mel, yaa leil beijjiu.

^t**12:20** Zeyixr Sul 25:21-22 leil vaexr dae.

seir bei su ca mel leil faxr lei lol arddeir a. ⁵ Yel nia vaervaerpor ddar no nia. Nia mel yaa nia leil faxr lei a gexr halae nia nixmox zzar lei saexl yaa ddar no a mel hoxr. ⁶ Vaervaerpor mel Arbosobo leil miar bei gger doxr dae a, yel nia suix sax a mel hoxr. ⁷ Cirza-hanga suix sax zoxr a nael sax; azo lerler per gger zoxr a nael gger; arseir leil gexr zoxr a nael, gexr, arseir leil i du zoxr a nael i du, hherdder azo lerler gger zoxr a nael gger, azo lerler bei zoxr a nael, bei.

Ca Mel Leil Arsae Perniar Nia?

⁸ Nia si dax azo ca dae a mel yar leil koxl gger nia. Nia zzicarzzi leil perniar doxr nia, hherdder zzi dax zzei bbe dae a koxl gger doxr mel sael a nga. Arseir ca leil perniar a mel dder Lixlfaxr leil miardal dae mel bei ci a. ⁹ Lixlfaxr miardal dae mel hherdder “kerjia nr ddo,” “ca seixl nr ddo,” “zzaegu ker nr ddo,” “si ddei cirza-hanga li niazzir nr ddo,”^u miardal dae hazza lei “ca leil perniar a mel armael leil perniar sael a perniar nia,”^v ddar eil qier gga hher ji dae a. ¹⁰ Ca leil perniar a mel ca leil bei no gger nr var. Yel ca leil perniar a mel dder Lixlfaxr leil miardal dae mel bei ci a.

¹¹ Nia ngo xilmeir bbeix dae mel sael a bei nia. Eilleix arsaesael nga var mel nia lei saexl. Niul leil jiuxl wo nixixl ddei bir niul Yisu leil ddarzzi beil halleix leil naer dae ho a. Yel nia yixrmeixljjiu dae nr ddo a; zucur nia.^w

¹² Neixmarmar ddei mel goxr jjia niazzir dae a, eilnirggu bbelele ddei

^u**13:9** Cu'aezixr Sul 20:13-15, 20:17 nei Semixljil Sul 5:17-19, 5:21 leil vaexr dae.

^v**13:9** Lixlweixljil Sul 19:18 leil vaexr dae.

^w**13:11** *Yel nia yixrmeixljjiu dae nr ddo a; zucur nia* Yilsi mel dder dawo nr ddo, zabbar seilseir a Arbosobo leil miar bei gger nia.

goxr ci du a.^x Yel niul neixmar ggie nr seir hal mel bei nr ddo, bbelele ggie zaxlddaexr a sserlabox mel vei dae a, nr seir hal mel leil dir.^y ¹³ Niul bbele ggie nixixl goxr dae ca mel sael a azo bei lei barbar-verver a bei, zzidda-zziyixr nr bei, capor-ssormaer buxlguaxr-laxlsixr nr bei, zzorji-ddaji a nrbba nrbba nr bei, zzi dax nr zex, ca leil nix-nr-nox. ¹⁴ Armael bei meixr hal mel xiar nr ddo, cirza-hanga Seirpor Yisu Zidu sael a nga nia.

14

Arzzi-nimar Arzzi-nimo Leil Bota Nr Ddo

¹ Nia nixmox zzar velver a ddar-nr-zzi su ca mel leil i nr du bei nr ddo, yaa nia dax xiar le-nr-sel zzorbbeixlei yaa dax zex nr ssa. ² Bir dae a bbeix, Yisu Zidu leil ddarzzi su ca arddeir a nael yar zzir dae a azo lei zzor ddo, nixmox zzar velver a ddar-nr-zzi su ca arddeir a nael yar zzir dae a var lar zzor ddo. ^z ³ Zzor su ca mel nr zzor su ca mel leil i zei nr ddo. Arbosobo zzor su ca mel leil lei yar ddei cassor-worssor bei lol a, nr zzor su ca mel zzor su ca mel leil zuixl dixl gger nr ddo. ⁴ Ni mel arseir a leir? Giel arsae si leil miar bei gger su ddei leil bota leir? Miar bei gger su ddei

^x**13:12** Neixmarmar ddei mel Yisu nr jjixr lei seir eilleix leil bbeix. Eilninggu bbelele ddei mel Yisu jjixr lei ho halleix leil bbeix.

^y**13:12** Neixmarmar ggie nei bbelele ggie Tisarloxrnixrjia Sul Vaexr Beil Ber 5:4-11 leil biar dae.

^z**14:2** Halcar a Arbosobo leil ddar-nr-zzi su ca mel zoxlzoxl a neir mel leil zzeir seixlzi. Arbosobo Ddei Sul ber leil eine bei nr ddo bbeix dae, yel Yisu leil ddarzzi su cirmelmel a zzir dae a, neir mel leil seixlzi goxr hor mel zzor nr ddo. Cirmelmel a nael zzir dae a zzor ddo. Gelixrdo Sul Vaexr Beil Ber 8:1-13 nei Qirsixlluxl Sul 2:14 leil biar dae.

bei hoxr bbeixsael bei nr hoxr yar seirpor bbeix leilei a. Seirpor Yisu yar leil beijjiu dae mel, yar bei hoxr var.

⁵ Ca cirmemel a nixixl cirnini hanol zoxlyoxl eine zzir, cirmemel a nael bbecir-bbeni lei ciryoxxr a nga eine zzir. Ca cirddeir-hanga armael arsae zzir dae mel velper a xiar har nia. ⁶ Ca cirmemel a Seirpor leil zi nixixl hal ni zoxlyoxl zzir a eine zzir a mel yar Arbosobo leil i du a nga arddeir a. Ca cirmemel a azo lei zzor, ca cirmemel a nr zzor aryoxryoxr zza. Zzor su nei nr zzor su mel lei Arbosobo leil nawo, yar leil i du. ⁷ Niul gol dae bbeixsael si zzorbbeixlei armael leil weix nr nga. ⁸ Niul gol dae a mel Seirpor leil weix a gol dae, niul si a lei Seirpor leil weix a si. Arsae nga zzorbbeixlei niul mel yar ddei ca.

⁹ Zidu si a yoxl gol du xixl lei a mel si ho nei gol dae seir ca mel ddei Seirpor bei niazzir a nga arddeir a. ¹⁰ Ni arsaenga a arzzi-nimar leil bota leir? Arsaenga a arzzi-nimar leil i zei leir? Niul maelmaerjjia lei Arbosobo meixsaer qier leil hher dae a, Arbosobo niul leil ser nia.

¹¹ Arbosobo Ddei Sul ber leil vaexr dae a bbeix:

“ ‘Ngo mel cirse-cirsil lei gol dae Arbosobo ddei nga a.

Ngo bbeix arddolcar a

ca cirddeir-hanga ngo leil cizixl gger nia,

ca cirddeir-hanga ddei meir gga ngo mel Arbosobo a cexrssexl nia,’

Seirpor eine bbeix a.”^a

¹² Eine nga a, niul cirddeir-hanga lei armael bei dae mel Arbosobo meixsaer qier leil bbeix teixl lei nia.

¹³ Yel niul zeixleixr zzi leil bota nr ddo. Nixmox zzar velper a xiar nia, azo bei lei si leil zuixl bei lol var hal mel bei nr ddo. ¹⁴ Ngo mel Seirpor

^a**14:11** Yirsaexlyal Sul 45:23 leil vaexr dae.

Yisu dax cir piar a bei a, ngo saexl, zzorlabox hazza lei sei-nr-beix ar yoxr nr zza; nael arseir zzorlabox arddolyox sei-nr-beix eine zzir dae a mel, yar dax bbeix ci a mel zzorlabox hal yoxr dder sei-nr-beix a. ¹⁵ Yel ni zzorlabox mel leil weix a arzzi-nimar leil zzasol lol arddeirnga a, ni dder yar leil per-nr-niar. Ni zzorlabox mel leil weix a yar leil Zidu dax bei nr mae nga lol nr ddo. Zidu mel yar leil weix a si a. ¹⁶ Ni si leil ni seirseir bei dae mel leil nrbbba bbeix lol nr ddo. ¹⁷ Arbosobo ddei goxr ddei gga mel yar niul leil arddolyox zzor, arddolyox dda mel leil i nr nga a nei, seirseir arla bei dae, zzi dax toltor a bei dae, Arbosobo ddei Xiu ddei niul dax hher dax dae a ggegge-sese arla bei dae hal mel leil i. ¹⁸ Arseir Zidu leil eil mel sael a eine visser a mel dder Arbosobo leil ggese lol a. Ca mel lei yaa leil kuar gger.

¹⁹ Yel niul azo bei lei zabbar seirseir bei a zzicarzzi dax toltor nga lol, zzicarzzi leil hhel du lei lol. ²⁰ Arbosobo arzzi-nimar arzzi-nimo leil beijjiu a Yisu leil ddarzzi lol a, yel nia zzorlabox mel leil weix a, yaa leil ddar-nr-zzi lol nr ddo. Hherdder bbeix: zzorlabox hazza lei seibeix, zzor ddo, nael arseir arddolyox zzor a kebal ca mel leil zuixl bei lol arddeirnga a, zzor su ddei lei bei nr hoxr a. ²¹ Hor zzor, puxrto zzibbaer dda bbeixsael azo bei zzorbbeixlei arzzi-nimar leil zuixl bei lol var hal mel tor nr bei. Eine bei a mel Arbosobo i dae a seir.

²² Zzor ddo zzor nr ddo ddei leil bbeix ci a, ni arsae ddarzzi dae mel, si dax bbeix ssi nr ssa. Armael zzir dae a armael bei hoxr, armael ddei armael leil botaddu nr zza a mel Arbosobo dder yar leil seir lol var.

²³ Nael ca mel yar zzir dae a zzor nr ddo hal mel zzor a mel dder armael leil zuixl dixl gger. Yar mel bei nr ddo yar saexl dae hal mel bei a nga arddeir a. Yar azo lerler bei a Arbosobo nr bei lol lei yar saexl dae, nael yar halae bei ssi a mel yar dder zuixl zza a.

15

¹ Niul nixmox zzar Yisu leil velver a ddarzzi su ca mel ddarzzi gax-nr-zi su ca mel leil beijjiu nia, armael leil lar xiar gger nr ddo. ²⁻³ Zidu mel armael leil xiar nr gger. Hherdder Arbosobo Ddei Sul ber leil vaexr dae mel sael a nga, bbeix: “Ni leil hie vuxryixr su ca mel hherdder ngo leil hie vuxryixr.”^b Yel niul cirddeir-hanga lei si leil seirggiebbæer xiar gger, yaa leil Zidu leil ddarzzi a ho bei ho hhel du lei lol. ⁴ Arbosobo Ddei Sul ber leil vaexr dae ddar mel mel niul leil mul gger a vaexr arddeir a. Sul ber leil vaexr dae mel niul leil ssersei xie lol, nixmox dder vaer lol. Eine nga a mel niul dder Arbosobo niul leil gger mel li wo loxia dae cexr a.

⁵ Arbosobo mel nia leil ssersei xie lol, nia leil nixmox dder vaer gger. Nia Yisu Zidu dax cir piar a bei a, Arbosobo nia leil zzi dax toltor a nga lol nia. ⁶ Yel daxrhoxr cirter a æe dae a, niul ddei Arbosobo hherdder niul ddei Seirpor Yisu Zidu Yarbbor leil bbeix zæe gger.

⁷ Yel nia zzicarzzi leil i du nia, hherdder Zidu nia leil i du mel sael a nga. Eine nga a mel dder Arbosobo leil middux lol a. ⁸ Ngo nia leil bbeix gger, Yisu Zidu Yoxrtaexl su ca mel leil visser a mel, ca mel leil saexl lol, Arbosobo Yoxrtaexl su ddei porpor mel dax bbeix har zaxr goxr mel yarzi bei ci nia. ⁹ Yisu lei a mel, Yoxrtaexl su nr nga ca mel leil lei Arbosobo yaa leil zoxlnixr saexl lol, yel yaa leil Arbosobo leil middux lol. Hherdder Arbosobo Ddei Sul ber leil vaexr dae mel sael a nga, bbeix:

“Yel ngo Yoxrtaexl su nr nga ca mel gga ni leil bbeix zæe gger nia;
caxlgo caxl a ni leil bbeix zæe gger nia.”^c

^b15:2-3 Sipi Sul 69:9 leil vaexr dae.

^c15:9 Sipi Sul 18:49 nei Sarmur'aer Sul Vaexr Maele Ber 22:50 leil vaexr dae.

¹⁰Yoxl bbeix:

“Nia Yoxrtaexl su nr nga ca mel mel
Seirpor ddei cassor-worssor mel dax cirgo a ggese nia.”^d

¹¹Halae bbeix:

“Yoxrtaexl su nr nga ca mel maelmaerjjia lei Seirpor leil bbeix zae
gger nia.
Ca cirddeir-hanga lei yar leil bbeix zae gger nia.”^e

¹²Yirsaexlyal lei bbeix:

“Arddolcar a, Yixi^f ddei giedae ca arddeir ddux lei nia,
ca eil ddei mel Yoxrtaexl su nr nga ca mel leil guaxr lei;
Yoxrtaexl su nr nga ca mel lei yar yaa leil jiuxl loxia.”^g

¹³Arbosobo mel niul leil seirseir mel li wo loxia lol su ddei nga a. Nia
Arbosobo leil ddarzzi a, Arbosobo nia leil yarzi sael ggese lol nia, nixmox
zzar zzaso lol nia. Yel nia Arbosobo ddei Xiu ddei ddoddomo bei dae mel
leil koxl dae a, ho bei ho seirseir mel daxlgaxl li wo loxia.

Barloxr Yoxrtaexl Su Nr Nga Ca Mel Leil Ddar Seirseir Biar Gger

¹⁴Arzzi-nimar arzzi-nimo, ngo saexl, nia mel nixmox yarzi seir ca mel a;

^d**15:10** Semixljil Sul 32:43 leil vaexr dae.

^e**15:11** Sipi Sul 117:1 leil vaexr dae.

^f**15:12** *Yixi* Yixi mel dder zzirmar Daxlweixl yarbbor ddei nga a.

^g**15:12** Yirsaexlyal Sul 11:10 leil vaexr dae.

nia beilabox mel maelmaerjjia nia saexl ho a, nia zzicarzzi leil lei mul gger var. ¹⁵ Ngo nia leil xil vaexr gger a nixmox vaervaermo ddar nr qier sael biar a mel, zeixleixr nia leil arsae bei nia bbeix gger. Arbosobo ngo leil seirseir meixl gger a, ¹⁶ ngo leil Yisu Zidu leil miar bei gger su bei lol, Arbosobo leil zi su mel sael a, Yoxrtaexl su nr nga ca mel leil Arbosobo ddei ddar seirseir mel biar gger ssi lol. Eine nga a mel Arbosobo ddei Xiu ddei Yoxrtaexl su nr nga ca mel leil seirceix-seirmaer loxr lol a, yaa Arbosobo leil ggese lol. Yaa mel dder Arbosobo leil zilabox hal mel sael a nga.

¹⁷ Yel ngo Yisu Zidu dax cir piar a bei a, Arbosobo leil visser a ngo dder kuar ddu zza a. ¹⁸ Ngo kuar ddu mel cirddeir a zza. Hherdder Zidu ngo leil sser dae a Yoxrtaexl su nr nga ca mel leil Arbosobo ddei ddar no lol a. Eil ddei leil cuxrteixl a mel ngo kebal kuar nr bel. Yisu Zidu mel ngo bbeix dae nei bei dae mel leil sser dae, ¹⁹ halae ngo ddoddomo, murgurgurmo bei dae mel leil sser dae a, Yoxrtaexl su nr nga ca mel leil Arbosobo leil saexl lol. Eil mel maelmaerjjia Arbosobo ddei Xiu ddei ngo leil bei bbesur zza lol arddeir a. Yel ngo Yiluxlsaler zzi gga cirdae a Yirlillirgur mermi zzezze lei Zidu ddei ddar seirseir mel cirmaex-hanga ca leil biar gger jjia ho a.

²⁰ Ngo xiar har dae ddei mel dder zeixleixr lei Yisu Zidu leil bbejjiur nr goxr ggie hal mel gga biar gger ssi. Si biar gger ssi goxr ggie hal mel gga ngo nr ssi. Ngo zzir dae a si biar gger goxr ggie biar gger ssi a mel, hherdder si sixrjiuxr xiax har ho a ngo xi ddei zi deix si sael a nga.

²¹ Hherdder Arbosobo Ddei Sul ber leil vaexr dae mel sael a nga, bbeix:

“Zeixleixr lei yar arseir a saexl nr goxr su ca mel yar leil mia nia; zeixleixr lei yar leil bbejjiur nr goxr su ca mel yar leil saexl nia.”^h

^h**15:21** Yirsaexlyal Sul 11:10 leil vaexr dae.

²² Ngo mel biar gger ssi su nr zza hal mel gga ssi doxr a, ngo leil dawo a, yel ngo nia dax halmaex ssi nr cexr.

Barloxr Loxrmar Zzi Gga Ssi Niazzir Dae

²³ Nael eilboxl ngo eilmaex gga miar mel bei jjia ho a; hherdder bbeix ddar seirseir mel zeixleixr lei biar ggie nr zza a. Ngo hormo koxl xilmeir leil dder nia leil i ssi niazzir dae a. ²⁴ Yel ngo Xibayar mermi ssi halcar a, nia dax halmaex ssi gel a, nia leil i lei a, nia dax argielggur hher niazzir dae. Nia lei ngo leil beijjiu a ngo leil Xibayar mermi ssi cexr lol. ²⁵ Nael eilcar a ngo hoba Yiluxlsaler zzi gga ssi a, Arbosobo ddei cassor-worssor mel leil beijjiu ssi. ²⁶⁻²⁷ Marcixrduixl mermi su ca mel nei Yalgieyal mermi su ca mel ggegge-sese a zzirbae gger a, Yiluxlsaler zzi gga Yisu leil ddarzzi su casolssor mel leil beijjiu.ⁱ Yel ngo yaa leil ho mal gger nia. Yoxrtaexl su ca mel Yoxrtaexl su nr nga ca mel leil Arbosobo ddei ddar biar gger a, yaa leil Arbosobo ddei Xiu ddei dax seirseir mel li wo lol a. Yel yaa Yoxrtaexl su ca mel leil beijjiu mibbe. ²⁸ Yel ngo zzirbae mel ho mal ci ho a, ngo beilabox mel bei teixl a dder, nia dax halmaex ssi gel a, Xibayar mermi ssi. ²⁹ Ngo lei saexl, ngo nia leil i ssi car a, Zidu niul leil cirza-hanga seirseir daxlgaxl-daxllixl meixl gger var.

³⁰ Arzzi-nimar arzzi-nimo mel, niul Seirpor Yisu Zidu leil ddarzzi a, Arbosobo ddei Xiu ddei niul leil zzicarzzi leil perniar lol a mel, ngo nia leil quex, nia ngo dax cirgo a, zabbar seirseir a Arbosobo dax ddar biar, yar leil qiuxr a ngo leil beijjiu lol. ³¹ Nia Arbosobo leil qiuxr a, Yoxrtaexl mermi Yisu leil ddar-nr-zzi su ca mel ngo leil bei no nr gger lol, halae

ⁱ15:26-27 Marcixrduixl mermi su nei Yalgieyal mermi su mel Yisu leil ddarzzi su Yoxrtaexl su nr nga ca mel a. Yiluxlsaler zzi gga Yisu leil ddarzzi su mel Yoxrtaexl su a.

ngo Yiluxlsaler zzi gga Yisu leil ddarzzi su casolssor mel leil beijjiu dae mel yaa leil ggese lol. ³² Eine nga a mel ngo dder Arbosobo xiar dae mel dax zox dae a, ggegge-sese a nia dax halmaex lei a, cirgo a wornol cexr a. ³³ Ca leil nixmox zzaso lol su Arbosobo ddei leil nia cirddeir-hanga dax hher dae lol nia. Amae!

16

Zzasoso Dae Biex

¹ Ngo, niul ddei arzzi-nimo Feibir mel yarzi seir nia leil saexl lol nia. Yar mel Jiegexrlir mermi jiaxlhuixl gga miar guaxr su arddeir a. ² Nia leil qie, nia Seirpor leil weix a, Arbosobo ddei cassor-worssor mel leil hexl mel sael a, yar leil hexl. Yar zabbar seirseir a ca cirke leil beijjiu goxr a; ngo leil lei beijjiu goxr a; yel yar leil azo beijjiu zoxr mel nia dder yar leil beijjiu nia.

³ Nia Baerzila nei Yaljula^j yaa nnel leil zzasoso dae biex nia. Yaa nnel mel ngo dax cirgo a Yisu Zidu leil miar bei gger. ⁴ Yaa nnel ngo leil weix a, olga pixl a lei nr gexr, yel ngo lar yaa leil nawo nr nga a nei, Yoxrtaexl su nr nga ca ddei jiaxlhuixl cirddeir-hanga gga ca mel lei yaa leil nawo.

⁵ Yoxl yaa ake gga jiaxlhuixl gga ca mel leil zzasoso dae biex nia. Ngo perniar dae Yirbaelnirtur leil zzasoso dae biex nia. Yar mel Yalxilyal mermi Zidu leil ddarzzi beil su ddei nga a.

⁶ Halae Marlixlyal leil zzasoso dae biex nia. Yar mel nia leil weix a hazzi sulku.

^j**16:3** *Baerzila nei Yaljula* Baerzila nei Yaljula yaa nnel mel capor maerssor a.

⁷ Nia yoxl ngo dax cir mermi su Adonirgur nei Yoxrnixryal leil zzasoso dae biex nia. Yaa nnel mel ngo dax cirgo a ge ji goxr a. Yisu miardal dae ca mel gga mel yaa nnel leil mel i du; yaa lei ngo xilmeir leil dder Zidu leil ddarzzi a.

⁸ Nia halae yoxl Alboxrlixl leil zzasoso dae biex nia. Yar mel ngo perniar dae Yisu leil ddarzzi su ddei nga a.

⁹ Ngo dax cirgo a Zidu leil miar bei gger su Erbanuxr nei ngo perniar dae Sildaxlgur, yaa nnel leil zzasoso dae biex nia.

¹⁰ Nia halae Yalbirlixl leil zzasoso dae biex nia. Yar leil mel cirza-hanga lei sixr i goxr, nael yar halae zabbar seirseir a Zidu leil ddarzzi doxr dae. Yallildobul yaa cirhhexr-lorbba leil zzasoso dae biex nia.

¹¹ Nia ngo dax cir mermi su Xiloxrti leil zzasoso dae biex nia; Narqixrsul hhexr ake Yisu leil ddarzzi su ca mel leil zzasoso dae biex nia.

¹² Yoxl Turfeinaxr nei Turfuxlsar yaa nnel leil zzasoso dae biex nia. Yaa nnel mel Seirpor leil weix a hazzi sulku. Ngo perniar dae Birxi leil zzasoso dae biex nia. Yar lei Seirpor leil weix a hazzi sulku.

¹³ Seirpor tiur teixl lei Lurful leil zzasoso dae biex nia. Yarma leil lei zzasoso dae biex nia. Yarma mel ngo leil yar ssor ga sael a perniar.

¹⁴ Yalxulqitur, Furlexlga, Heimir, Baloxrba, Heimar nei yaa dax cirgo a hher dae arzzi-nimar arzzi-nimo mel leil zzasoso dae biex nia.

¹⁵ Feiloxrloxrgur, Yoxrliyal, Alirba, Nixrlilyal nei yar ddei arzzi-nimo,

halae yaa dax cirgo a hher dae Arbosobo ddei cassor-worssor mel leil zzasoso dae biex nia.

¹⁶ Nia zzicarzzi leil zzasoso dae biex nia.^k

¹⁷ Arzzi-nimar arzzi-nimo mel, jiaxlhuixl gga ca cirmelmel a nia leil toltor a nr nga lol, Yisu leil vever a ddar-nr-zzi lol a ngua nia leil mul gger dae mel leil dir. Yel ngo nia leil quex, yaa leil fadae nia. ¹⁸ Ca eil mel mel niul ddei Seirpor Zidu leil vi-nr-sser, armael xilbe taex leil weix lalnga, yaa halae ddar noni zaezaemo hal mel bbeix a, nolba nor su ca mel leil fur. ¹⁹ Daxrhoxr lei nia Arbosobo dax bei mae dae saexl a, yel ngo nia leil ggese gger. Nia ho bei ho seirseir mel saexl dax; nr seir mel cirdoxr lei nr saexl. Ngo mel dder nia leil eine nga lol xia dae.

²⁰ Ca leil nixmox zzaso lol su Arbosobo mel Sardaxl te leil jjiux gex dae a, nia qihher woxrke hher dae lol du a. Niul ddei Seirpor Yisu nia leil seirseir meixl gger lol nia.

²¹ Ngo dax cirgo a miar bei su Tixrmoxrtaexl nei ngo dax cir mermi su Lulqiuxr, Yisui nei Sorxibadaexr yaa lei nia leil zzasoso dae biex dae.

²² Daexrdiur^l mel ngo dirtu bei a, xil eil fo vaexr. Yar Yisu dax cir piar a bei a nia leil zzasoso dae biex.

²³ Gieyoxr lei nia leil zzasoso dae biex dae. Yar mel ngo leil hexl, yoxl jiaxlhuixl gga ca maelmaerjia leil lei hexl. ²⁴ [Zzi gga zzirbae guaxr su Yirladu nei niul ddei arzzi-nimar Koxltur lei nia leil zzasoso dae biex

^k**16:16** Halcar cirmaexmaex a ca mel zabbar seirseir a zzasoso dae biex a mel yaa qiaxrmeix ddei leil jiuxl. Yoxrtaexl su ca mel gielgiel eine bei.

^l**16:22** *Daexrdiur* Barloxr nael ddar bbeix dae; *Daexrdiur* nael yar bbeix dae mel vaexr zeil lei.

dae.]^m

Arbosobo Leil Bbeix Zae Gger

²⁵ Arbosobo mel ngo biar gger dae ddar seirseir mel leil sser dae a nia leil nixmox ddei hhel du lei lol var. Yisu Zidu leil biar dae ddar seirseir eil ddei mel halleix ca mel leil nr saexl lol, ²⁶ eilleix sael saexl lol. Ngua mel xiezi vaexr dae sul mel sser a ddar seirseir eil ddei ca mel leil saexl lol. Ngua eine bei a mel cirse-cirsil lei gol dae Arbosobo miardal dae ddei dax zox dae a bei arddeir a. Yel circuxr-hanga ca mel leil yar leil ddarzzi lol, yar ddei ddar no lol. ²⁷ Arbosobo mel cirddeir lar zza. Yar nr saexl lei ar yoxr nr zza. Yisu Zidu bei dae mel leil ngol dae a cirse-cirsil lei Arbosobo leil middux lol nia. Amae!

^m**16:24** *Zzi gga zzirbae guaxr su Yirladu nei niul ddei arzzi-nimar Koxltur lei nia leil zzasoso dae biex dae Arbosobo Ddei Sul cirberber a ddar eil qier nr zza.*